

處州府志

ル 5
1573
17



門 5
號 1573
卷 17



處州府志卷之十八

處州府知府元和潘紹誥重修

人物志

經濟 理學 忠義 附難 孝友 篤行 文苑
隱逸 藝術 流寓 方外 列女 附難

栝蒼自李鄴侯繁興學後傑士竒才後先相望勲名
理學文章操履炳耀一時昭垂千古矣而論者每於
梁汝嘉潛說友有微詞通志亦論及之謂人物志率
多誇飾第知人論世維時委曲周旋亦有後人所難
臆度者善善從長述其善者可已古人已往何多求
焉志人物

人物志上

經濟 理學 忠義 附難

經濟

曷言乎經濟也大則安邦定國如劉文成學貫天人
勲垂簡冊是小則一官一邑繭絲保障治行卓著者
皆是大受小試各因其遇各奏爾能皆經濟才也士
君子學古入官緬先達之事業必有奮然自勵求為
有用之學者是記載也而則倣存焉

唐

施約詮縉雲人仕至銀青光祿大夫簡較太子賓客兼
監察御史封東陽郡公諡靖弟約言仕至迎衛鎮邊
都知兵馬副使銀青光祿大夫封縉雲郡公諡勝唐

季聚兵黃龍山保障鄉邑有功朝廷改其所居泰康
里為靖勝里

吳越

章德安麗水人吳越時為內都監使文穆王文瓘寢疾
察其忠厚聽斷欲屬以大事語之曰宏佐尚少當立
宗人長者德安曰宏佐雖少羣下服其英敏願王勿
以為念王曰汝善輔之吾無憂矣

宋

王元字常侍麗水人由進士初授延平令奉使遼北所
在嚮風歸擢處州刺史位官忠義惠政及民范仲淹

歐陽修咸以詩榮之

祝亞麗水人元豐進士知閩縣不畏強梗以郡守監司薦大觀中召爲太常卿陞對詳切官至中大夫

祝粹字子元麗水人元祐進士爲分水令有政聲百姓生子皆以其姓爲名後坐黨禁止宣教郎

祝廷字邦直麗水人年十四入太學紹聖中進士屢持使節明敏有聲官至中大夫衛尉少卿

吳詳字守約麗水人崇寧間爲蘇州教授時中貴人朱勗怙權居蘇州詳獨不屑見人稱其介及爲福建路茶司提舉以廉著名子祇若登紹興十五年進士

梁汝嘉字仲謀麗水人政和中補登仕郎建炎初知武進縣時金人入汴高宗南渡至常州守倅俱遁獨汝嘉浚築防守就除通判提舉浙西常平會駐蹕臨安由轉運判官知臨安府上而宮闈次而三省六部百司庶府一時辦集遂成都邑遷戶部侍郎歷守平江明溫台婺宜鼎諸郡終寶文閣學士右通議大夫致仕追贈少師爵縉雲郡公家居鄰郡學捐地基以創齋廬至今繪像於學春秋祀之初在戶部時朝議以國用不足欲拘刷郡縣養士餘糧以助軍需汝嘉奏言學校者風化之原昔漢光武中興投戈講藝重學

校也然學校之設必有以爲養士之資凡贍學錢糧不得輒更拘刷上可其奏子叔玠知柳州季琚歷官至吏部侍郎行部恐擾州縣不宿城市常曰吾以清白遺子孫丞相謝深甫稱之曰真廉吏也玠子二銛最知名乾道八年進士錯紹熙元年甲科第六人琚子鑰朝散大夫知興國軍

林覺字大任麗水人紹興間爲戶部侍郎奏減民間夏稅丁鹽綢絹仍乞第五等戶折納見錢又以鑄錢精巧詔除敷文閣待制六孫各通一經四孫中乾道二年進士廣東提舉知惠州

王信字誠之麗水人紹興間中進士第爲温州教授會郡饑疫以賑救爲已任爲勅令所刪定官書進秩纔少十二日或謂盍少遲信曰遲之爲利是欺君也已而孝宗語時相以信在勅局久當序遷相以未常見其求遷對上曰不求遷乃見其賢爲考功郎官時相以三蜀士屬信不可相服其有守因奏近日銓曹清皆信之力有軍官賂吏僞爲磨勘蔭薦察其奸白都堂付之理吏無所容共禱於神願無爲考功官上聞之喜曰一郎官乃能爲朕任怨除中書舍人遷給事中會高宗升遐有已罷逐中貴人甘昇因山陵事復

入信極論斥之上以語學士洪邁曰山陵事重又太后之命卿見王給事可道此意姑容之前後論事忠讜明暢上屢呼其官而不名知紹興府奏免積逋錢米帛絹以百萬計開山陰淳瀦注之海民德之歌曰湖水溢大田失湖可耕民以生名之曰王公湖置義田活民之不舉子者創義廩資民之無以葬者制誥得古體字逼米元章先是嘗假禮部尙書使金與金人肄射都亭連中其的金人甚敬憚之呼爲黑王相公之後尤愛其書求乞者踵相接得片紙珍如拱璧及歸言金人必衰之兆有四在我當備之策有二上

首肯之著有是齋文集若干卷守紹興日置田贍學及居家又捐己田助學養士繪像於學春秋祀之弟仁紹熙元年進士官至太常寺丞知衡州仍淳熙十四年進士何右科伋倚特科子麟知彬州駒知嘉定府會吳曦叛能修戰守備曦平以功再任麟之子琮右司郎官知江陰軍

盧彥德字國華麗水人厲志恬退在選調二十年喜怒不形於色知廣德軍建平縣舊版籍有絕戶物力錢抑民代輸縑疋民苦之多逃亡彥德至大搜隱漏以實升降物力三倍於前籍乃當其賦削虛產二千餘

戶於是逃者復歸兩守蜀郡再歷憲曹並著聲績召
爲戶部郎官除福建轉運判官至朝請大夫

周汝明字舜卿麗水人紹興進士知德興縣有邑人余
學詩訟兄分財汝明署其牘云旣名學詩必識棠棣
百里稱頌官至韶州守

閻邱昕字逢辰麗水人爲義烏令有政績薦除監察御
史累遷吏部侍郎給事中以敷文閣待制知温州時
有薛姓者秦檜親黨也居郡承檜密諭造漆器昕持
正不從薛怒諷檜黜之昕嘗憤權臣專政作周易二
五君臣論以排用事者平生不殖產至無宅可居事

聞詔給宅賜之太守馬公光祖卽其地建祠扁曰清
風鄉人趙崇潔官太常陳乞請謚太常博士趙崇璠
撰謚議曰孟子云富貴不能淫貧賤不能移威武不
能屈此之謂大丈夫今昕爲言官爲給舍爲選部以
獎廉靜惜名器爲先務故不爲權勢所撓真可無愧
於大丈夫者矣謚法臨官潔正曰清壹德不懈曰簡
請合二美以易昕名考功郎官洪勳譔覆議曰士有
去百年而使人追慕思所以表章此其名節必有不
可泯者至如昕剛毅之氣不可奪也請如太常議奏
謚清簡

葉宏字夢符麗水人乾道進士爲人倜儻蒞官明敏任武學諭註兵書被褒賞累遷大府少卿總領江東軍馬錢糧

郭泰亨字亨甫麗水人淳熙進士會呂祖儉詆權相韓侂胄貶韶州泰亨素交祖儉因贖其行坐黨禁黨禁解爲清流縣令修學宮增學廩多士祠而碑之擢臨安府時史彌遠當國有上書忤其意者繫獄委官鞠問泰亨辨其無罪不肯枉置於法彌遠怒遂致仕梁安世字次張麗水人少穎異讀書過目成誦與張孝祥爲忘年友淳熙間由進士自大農丞出守韶州累

官至轉運使所著有遠堂集

潘叔豹字仲虎麗水人淳熙進士知萬州與魏鶴山爲道義交時有僧窖地匿民婦叔豹發之毀其寺子杞登嘉定元年第至大府寺丞孫屋嘉熙二年太學奏名屋子應發咸淳三年鄉薦著筆志三卷

蔡仲龍字子奇麗水人嘉定十六年及第第二人持心平恕議論近厚郡守欲遷州社仲龍曰苟無大故不必變置守服其識官至大理少卿出知信州

朱天民字覺甫麗水人景定進士婺州東陽尉攝金華義烏東陽三縣皆有聲及再任浙西安撫司僉廳以

禮法繩貴戚凜然有臺官風采由是益有聲除平江府節度判官

華登雲字南伯麗水人咸淳進士任錢塘尉尉司在西湖近平章賈似道府平章好苛察尉未歷歲多罷登雲獨以治聲聞

潘特疎字廷立青田人大觀庚寅進士宣和間與秦檜同爲學官終日危坐讀書檜甚敬憚及檜秉鈞軸爲宰掾多所正救善類賴焉擢守大理卿尙書右司員外郎賜緋魚袋制誥褒之以言顧其行云

蔣繼周字世修青田人七歲賦牧童詩有回首一聲笛

斜陽遮半山之句甫冠登紹興進士歷官二十餘年奏對論事剴切孝宗稱之曰卿文大似陸贄擢居言路知無不言歷御史中丞禮部尙書卒之日帝震悼罷朝贈少師光祿大夫開國男諡文恭所著見藝文志

鄭汝諧字舜舉青田人登紹興進士穎悟貫洽出入五經權衡諸史辛稼軒見之曰老子胸中兵百萬丞相洪景伯薦於朝孝宗書於御屏曰鄭汝諧威而能惠時浙東苦旱舉行荒政轉大理少卿持公論釋陳亮囚進吏部侍郎告老投徽猷閣待制致仕居鄉多惠

愛邑人生祠之著論語意原真德秀爲之序餘見藝文

葉翥字叔羽青田人紹興甲戌進士累遷戶部長貳前後凡八年時會稽和買視他郡爲重民甚苦之翥奏蠲三萬餘疋民得稍寬慶元間除同知樞密院事以觀文殿學士致仕賜爵衛國公

鄭如崗字山甫青田人汝諧子少侍父使燕過故都忠憤發爲詩歌自相倡和名專對集以蔭歷新淦金華令守衢婺二州江東提刑福建轉運使一以簡靜爲治人爲吏部侍郎紹定庚寅劍寇猖獗聲撼永嘉邑

糴告竭移書廟堂通浙東港禁及置惠民倉民繪像祀之紹定間封開國男子思問用祖蔭知武義縣有活民政歷官兵部侍郎封縉雲郡侯

留駿字慶遠青田人登淳熙進士歷仕國子監丞輪對造楮之弊深切時病終尙書郎官

陳希黥字子與青田人汝錫之孫淳熙八年廷唱第四王人由軍器監出爲福建提刑民多德之進中書舍人積階至通議大夫贈光祿爵青田開國男食邑三百戶諡文肅弟希黥進士任泉州僉判子仲堪仲埴俱貴顯仲坊官至侍郎贈開國男

留祺字履道青田人廉介自持登紹熙進士凡三仕三已晚始由掌故爲國子正出守峽州未幾卽上章謝事朝廷高其節增秩榮歸

王唯元青田人寶慶間授大理評事沉靜寡默每按事有弗辜者輒垂涕爲之求生

趙師善字元之青田人授政和縣簿有梗化者數諭以大義眾咸悅服轉福建路提舉常平司幹辦公事俄以疾終所著有詩集藏於家

陳適孫字與可青田人讀書明醫淳祐間入官歷任兩淮節制司僉判陞節度使孫瑞仁茂世襲訓科爲時

名醫

陳景行字行之青田人登寶祐間進士任紹興府教授遷國子監丞陞殿中侍御史兼禮部侍郎浙東安撫使著有奏議若干卷

陳壁字仲壙青田人性卓犖無崖岸寶祐進士初授宣教郎舒城尉歷司理參軍縣令通判凡七仕終國子司業文信國公銘其墓

朱濤字巨濟縉雲人宣和七年中試禮部調南康尉知新昌浦江二縣有政績

詹义字持國縉雲人以直亮文學著徽宗常呼先生而

不名累官至兵部尙書歷仕四朝靜正忠鯁爲時所
忌力丐休高宗以其恬退有守進端明殿學士主管
洞霄宮以罷其歸時汪藻承制謂又勁直多聞確有
所守遵聖語也後高宗對執政語曰詹又文章泰山
北斗欲大用之屢召不起卒謚惠安

田渭字伯清縉雲人辰州教授五溪俗與中州殊絕渭
勩學宮刻典籍立程度推誠訓育俗爲一變遷司封
郎在朝八年廉靜自持故舊多要路恥私附凡奏對
十餘疏如固國本正風俗變役法甚切世務除浙東
提舉常平歲歉究心荒政除台婺處三州戶科茶稅

又奏罷五等差夫送迎之擾民賴以安著有朋雲刀

筆璽齋集

朱藻縉雲人調漢中簿兼尉南渡以來夷陵之士鮮有
登第者藻爲考官所取皆名士向學者如眾知浦城
縣積逋以緡計十餘萬郡吏迫以輸期藻曰與其橫
歛於民寧得罪於郡卽日罷歸先是邑有黠寇前令
莫敢誰何藻至悉寘於法邑民快之爲立生祠終煥
章閣待制

陶育字尙盛縉雲人紹興間仕至忠義大夫贊治尹兼
黃巖州丞居官勤敏以清慎表率僚屬

詹宗契字彥敷縉雲人以世賞入仕終知南康建昌二州所至有聲撫湖外之民講救荒之術丞相葉淮舉其廉能孝宗詔褒獎之

蔣則字朝式縉雲人舉進士授文林郎南陵尉適歲大稔諭巨室出米數十萬石減直賑糶惠及當塗池陽之境修復廢陂溉田數萬頃詩體平淡深得盛唐人之境修復廢陂溉田數萬頃詩體平淡深得盛唐人之志趣佳句多落人口嘗試百鴈圖姜特立指爲雞羣野鶴

田聞龍字宜甫縉雲人調武義簿地積逋稅數萬計郡急督徵聞龍謂蠶未登時尤難處不忍病民以阿順

呂東萊門人書繭絲歌頌之藩閩聞其賢俾知婺州晚以四會知縣致仕

黃邦彥字退翁縉雲人知雩都縣廉潔有聲民甚德之吏以治盜請邦彥曰以民視民何忍爲盜作廉寬公勤四銘刻於邑治以勸後人盜風遂息立朝議論忠鯁不畏強禦人多忌之官至國子博士轉知興化軍陞授宮講朝散大夫

趙崇潔字敏則縉雲人累官右司郎官每以人才爲宰相薦理宗朝中貴盧必升等專權無一人敢言崇潔乞罷斥以肅官府由是名振朝野居官不受私謁所

至以激揚著聲

潛說友字君高縉雲人由進士歷官知南康軍浙東安撫使兩浙運使知臨安府才器宏大善剴繁治劇時臨安爲京都凡宮壺財用廟堂意嚮民訟之曲直物價之低昂皆在審度之內先任是官者多以曠職去說友處之裕如以戶部侍郎轉尙書官至端明殿學士縉雲郡伯出知平江府

沈造字次仲縉雲人歷官至通判廉直不阿初知漳浦海寇作亂將及境聞造有政聲卽引去判潮時有韓山神歲須男女以祭造焚其廟毀像得巨蛇烹之民

爲立祠有文集二十卷胡權謂其書似歐陽詢而清勁過之

詹廣字安止縉雲人歷官兩浙提舉通判定武安肅貞定三軍州江陰南劍所至咸稱其能運使呂頤浩丞相朱震安撫陳亨伯並舉其賢能

羊補之字景順縉雲人以世澤補承節郎監金華縣孝順鎮景定初改保義郎沿江制置司大使終知公安望江縣爲政甦安凋瘵賦平獄靜

潘景夔字和叔松陽人初爲德清尉邑有富民爲盜所掠躬捕獲二十人法當改秩同僚賀之景夔愀然曰

是得無誑誤者耶若以幸賞為心則吏卒鍛鍊以成獄吾不忍為也同僚歎服

程樟字喬仲松陽人姿稟粹和局度夷曠文史之外無他嗜好事繼母以孝聞待諸弟尤篤恩義投運司州理妖民龔陸以左道具獄推究其誑誤者數百人改知侯官新學宮與弟子講禮習射守廉州政尚簡淨置平糶倉以濟民飢擢廣南西路憲使凡所舉刺不市恩避怨而獎誘後進尤拳拳焉

程榆字森之松陽人九歲能屬文既登第孤介特立恥事媵阿家居雅好作人嘗建義學置田以贍師儒宰玉山時真西山疏其天資靖重心術端良及持廣左憲節史彌遠惡其不附已安命不屈官至中奉大夫職秘閣爵松陽開國男食邑三百戶諡曰安節

何琮字宗玉松陽人初授吉州安福簿始至大書門屏曰以儉養廉將勤補拙入朝除左正言轉殿中侍御史先此臺諫駁為宰相私人有彈劾先進副封琮獨守古法斥貪逐佞多合清議與相意忤改為起居舍人一日諷琮駁陳垣除命答曰琮他日尙欲附善類相怒即日左遷為福建轉運副使相去召入為戶部侍郎理宗嘗夢神人云天下欲太平何琮作宰相異

日以語學士趙汝騰當國者忌之遂不果大用友人
以詩悼之曰空形良弼夢只戴侍臣冠

潘大臨字舜舉松陽人嘗以兩浙運司主管文字官攝

温州獲海寇五十閱其實釋無辜者半復以太府寺

丞出權真州茶鹽時相丁大全使人諷之曰有羨獻

即受賞大臨曰吾一錢皆籍縣官羨餘何取大全怒

馳代者夜半奪印去後知廣德軍

王唐珪字廷玉松陽人歲饑邑尹勸貸珪方卯角請書

於籍願以千石濟之眾異其志淳祐元年登進士親

老歸養十年不仕丙寅授紹興府法曹乙巳差尚書

省簡閱官分平江未幾攝監察御史適當輪對珪上

封事言平天下之道正心誠意為本守令不職實由

宰輔奸邪罔上不以副封達時賈似道怒諷御史陳

堅彈罷之

毛蘭字君玉松陽人資性冲淡莊重簡默事父母以孝

撫孤嫠以恩官福州司理時宰相趙汝禕之黨林冕

有罪下獄使人夜懷金私之蘭正色不受復賄當道

者以威恠之不動其人卒坐法汝禕聞而嘉曰蘭持

法如此何有廷尉後召蘭不果行累官二十載歷政

凡九考居最卒止承直郎未能脫選時咸以劉向比

之

潘自中字時父松陽人爲江州司理日有吳門鹽商牽聯就縛吏承上意欲加罪沒入其資自中曰入人之罪以媚人吾不忍爲也力雪免之州部將二人以軍賦牴牾繫於獄統戎者以宿憾欲死之符取自鞠使之誣服自中走白於府深明其誣二人賴以免

周綰字彥約遂昌人年十七入太學崇寧五年中進士甲科五剖符持節再領大藩爲國子祭酒吏部侍郎以敷文閣待制致仕廉節著名爲王十朋見慕號蓮峯先生祀於學

鄧熹遂昌人宣和中睦賊犯松陽遂昌熹捐家資集鄉民與賊戰勝遂全兩縣郡守黃葆光聞於朝增秩賜金官其一子

間邱觀字民表遂昌人倜儻有大志宣和癸丑睦州寇變賊首洪載據松邑攻遂昌勢頗張朝廷下詔安之觀慨然請行以義感賊成約而還授承信郎靖康初本路帥命部衢婺處三州兵赴難霸州及還遇高宗渡江領兵勤王特旨轉三官凡歷九任積官至武翼大夫

王仲傑遂昌人由特奏名知星子縣朱子劄白鹿書院

令董其事與呂東萊書稱其老成忠厚

張貴謨字子智遂昌人由進士主吳縣簿撫州教授宰江山縣會亢旱閔雨因覽鏡有詩云不見片雲頭上黑頓添一夜鬢邊霜遂蠲其賦之十八郡守怒詰之力陳其害不能奪光宗卽位謨投匭進書極言民力已窮邦本不固凡科歛之繁宜一切罷去以廣維新之澤剴切幾萬餘言後轉朝奉郎輪對敷陳三劄及民間疾苦十八條光宗嘉納之三年除太常主簿五年除司農寺丞轉朝散郎一日以劄子袖見時宰論易革與大過之義有忤是歲西浙旱災毗陵獨甚城

邑騷動遂出知州事陞辭奏陳飢民之數及給降米斛光宗曰米未多卿且好去賑濟故謝表有曰聖慮紅粟之未多而奉玉音之甚切蒞任講行荒政飢民賴以全活者五十萬眾次年轉朝奉大夫賜對便殿論人君之心與陰陽之氣相感實歲之豐歉所係上皆嘉納除吏部員外郎陞郎中樞密院簡詳諸房文字奉使金國回內殿因論禮莫重於分分莫重於親今北兵犯分而夷其親雖欲不亡得乎願朝廷爲內修外攘之備極言時弊凡二十餘條轉朝散大夫遇行郊禮又極言郊赦乃小人之幸不可爲常上可其

處州府志卷之十一
奏後遭煩言奉祠歸里以磨勘轉朝議大夫特封遂昌縣開國男食邑三百戶所著有九經圖述韻畧補遺子二如說文林郎如詠廸功郎太史陳希烈狀其行

何琬字子温龍泉人皇祐進士七厯監史神宗疏其名於屏曰政事何琬文章葉濤除龍圖閣學士荆公東坡有詩倡和

何執中字伯通龍泉人熙寧進士厯官吏部尙書大觀間特進尙書左僕射會正官名改太宰進少傅秩加少師進榮國公宣和間追封清源郡王諡正獻御書

弼亮元儒潛藩舊德太宰正獻何公墓

吳庸龍泉人熙寧間第進士賜名伯舉累官至龍圖閣學士贈少師耿亮博雅爲中外表望謝政歸儲書貽後代有顯者

管師仁字元善龍泉人由進士崇寧中知建昌軍有善政除左司諫轉吏部侍郎刑部尙書以樞密直學士知鄧州兼西南路安撫使未行改知揚州兼淮南東路兵馬鈐轄無何徙定州安撫使時北虜自景德盟好百餘年上下玩愒師仁至則預爲邊計後北使再至請地間有備遂寢徽宗賜詔褒獎曰有臣如此朕

復何憂召爲吏部尙書尋拜知樞密院事封南陽郡侯會病乞致仕以資政殿大學士佑神觀使卒賜葬於汴

張端禮字南仲龍泉人登崇寧進士授朝散郎僉判無爲軍事王蔡當國引疾致仕居官政治爲世吏師封紫金光祿大夫丞相李綱誌其墓

季知元

龍志作季和元

龍泉人崇寧癸未舉特奏名出官淮西

學值設律科復魁律學除撫州法曹轉知江陰寬簡樂易吏民安之以朝奉郎致仕

張著字少微龍泉人崇寧進士初授永康縣毀淫祠除

山洞蠻盜提轄京東漕權貴爲奸俾民入錢給符而漁著劾奏弛禁民得其利留貳天府未幾國步艱難車駕駐蹕揚州因罷歸紹興中再守臨江平易近民戶口增七萬餘部使者以治最聞治廬陵豪民歐陽廷光獄得實續御史案舉江南不法官吏十餘人悉送著治獄無滯兵荒民鮮習儒著建學興士後祠於學宮時士夫趨權貴而著獨有守靖康之難不汙僞命上將用著而以鯁直忤時相出知筠州

張仁及字彥厚龍泉人登崇寧進士初調永嘉簿攝樂清縣事海舟篙工持刃私鬪地方以海盜申仁及察

其情杖遣之吏禮尙書劉嗣明張叔夜咸以優於學
行薦除諸王府記室賜五品服權太子侍講後以疾
致仕嘗謂窮達自有時命譬之寒暑四時之運惟當
安之故號順應居士

劉知新字元鼎龍泉人少穎敏淹貫經史游太學有聲
大觀初廷試第一出知綿州有惠政

吳競字寅仲龍泉人弱冠登進士宰會昌值潰卒楊勅
入境殺二尉城幾不守競挺身抵賊壘諭以義悉降
宣諭使嘉其忠勇聞於朝陞處州通判稱循吏

季陵字廷仲龍泉人少孤力學每試先多士擢政和二
年上舍第遷太學博士論學術邪正異同被譖謫舒
城縣建炎間虜騎奔突朝廷儀物盡棄陵取九廟神
主渡江甫浹日拜中書舍人因諫天久雨寒由金人
累歲塗毒生靈所致又云將帥官寺權制中外陛下
當修德應天裁抑羣下上納之

季穎字洪叟龍泉人受易於同里沈光朝登紹興進士
除吉州太和簿歷官安陸縣廉正勤恪民德之遷柳
州通判未赴卒

張溥字德施龍泉人紹興進士知莆田縣通判南安軍
淳熙改元差僉武安軍以代還擢守邵武陞對論忠

慶州府志 卷之十一
順官廩給之患上然之九年差知岳州陞對論常平
虧欠之弊欲令州縣申其實數寬其已往之罪講明
方來之法復論欲令忠順官任滿迭相注授稍令待
缺以寬廩給上首肯之以年老力上祠請除福建參
議未赴卒

何備字德輔龍泉人登紹興進士調德清縣簿時和好
初成備哀少康宣王光武元帝事可施行者爲評議
號中興龜鑑上之除紹興府教授尋除福建提舶約
束甚嚴厯官工部侍郎兼直學士院乾道間以集英
殿修撰知衢州東宮特賜詩祖餞改知寧國卒上哀

之加敷交閣待制贈朝請大夫有奏議內外制西漢
補遺孝經本說王府大學講義

何偁字德揚龍泉人備之弟也紹興二十七年中甲科
第四人隆興間爲吏部郎官時金人再犯淮主議之
臣欲棄唐鄧海泗四州偁上封事願請上方劍斷姦
臣頸朝論以漢朱雲目之後除福建提舉偁風度清
雅有晉人氣象羣書過目輒記博古多藝尤精筆法
爲世所寶有玉雪堂集傳於世

張洙字子原龍泉人紹興進士初調東陽簿轉遷撫州
通判未赴高宗內禪廷臣咸以洙薦陞對言甚激切

有關政治上稱善曰卿宜居朝列尋除國子監

張商卿字宗尹龍泉人紹興進士知滁州日極論屯田之害謂開耕之初率民田充數名曰借獻其實攘取募民代錢名曰和顧其實差科後爲淮南轉運判官季顥字和叟龍泉人隆興進士歷開州知州始至先節浮靡郡計稍足繼蠲宿逋去積蠹奏除省額四千餘緡減州額六百餘緡擢東普知府普連年病饑顥講求荒政至廢寢食

胡紘龍泉人事詳宋史

季南壽字元衡龍泉人七齡時有籠鶴者父命以冲天

鶴勢高之句卽日出洞龍頭聳父大奇之後登紹興進士中博學宏詞科歷有政聲孝宗疏其名於屏尋擢禮部侍郎已而請祠除直秘閣明年守新安上命宰相擇東南士守蜀以南壽知簡州發奸摘伏如神徙守眉陽民夜苦暴水南壽出令救一人者與已俸五緡活人甚眾後上疏乞休進直顯謨閣致仕

何侑字德獻龍泉人太師冀國公平之曾孫也侑志學通經史作山谷體詩文諸父大稱賞調福州古田簿時方弱冠遇事通解攝縣事取滯獄決遣之輕重得情改官臨安府於潛縣縣豪徐衡武斷鄉曲不能誰

何侑拒不通見衡由是退聽屏氣無敢復言通判廬州就差知黃州黃多盜聯鄉社保伍盡破其根株窟穴盜無所舍奔走北境除荆湖南路提舉常平茶鹽事秩滿除轉運判官會盜發廣西陷藤潯高化四郡都督左僕射張公浚舊知湖湘雅知治狀奏曰何侑前治黃聯保伍盜平息今謀帥莫如何侑遂除直秘閣經畧安撫廣南西路兼提舉兵馬事及至盜已平侑撫瘡痍之民宣寬大之詔剔蠹除罅府賦用充繕甲勵兵軍容克壯

何侑字德器龍泉人早孤以伯祖正獻公遺表恩補將仕郎調信州司戶用薦循資監鎮江府庫部大軍庫政知秀州海鹽縣未赴會朝廷遣使虜廷侑爲遷官二等尋改差鎮江府糧料院秩滿提轄行在擢大理寺丞出知漳州代還尋除江南東路茶鹽司嘗謂官無煩劇要以公勤廉正爲主故入仕二十餘年多著績用始終無玷曾作天爵銘吏治戒并嘆習一篇皆中薄俗又哀次之爲家集五十卷有覽古史斷二卷自號存齋寓居於雪川

何澹字自然龍泉人乾道間中禮部第二厯官御史中丞參知政事奉祠祿閒居十餘年寧宗以其舊學眷

遇甚厚長子處仁知袁州處仁三子宗姚與賈似道不合遂家居轉官至奉直大夫從子處久徙居郡城碧湖玉溪修築堰隄功績甚大

張津字子問龍泉人乾道特奏名第四廷對擢首選授太平簿至則索學隱伏田以厚廩餼進諸生講明經義居官不阿人以爲有仇考城風文雅過之後歸曰延邑老成講道誘掖後進著有曲江集四書疑義公簡筆錄

季庚字希白龍泉人淳熙進士官至浙西提刑政聲綽著

連元字長卿龍泉人開禧進士累官至衢州府知府德濟郡民上聞嘉獎賜紫金魚袋郡立生祠祀之

張恂字公亮龍泉人嘉定進士初授麻城簿以討平湘賊陞襄陽郡判治二載湘賊復興藩使復遣鎮守鄱陽幾一載大旱值奸臣誤國貶恂南安湘賊相議曰府判因我等叛而落職可焚其巢而去上嘉其能遷知梧州謁襄節度使具言軍餉足用之法上善其處置召賜帶笏擢戶部侍郎兼江東安撫使賜爵龍泉縣開國男食邑三百戶

陳存字體仁龍泉人太學上舍淳祐七年第三人文章

政事皆有聞譽仕至兵部尙書端明殿大學士知慶元府沿海制置使

季可字處仁龍泉人寶祐丙辰進士初調義烏縣簿累官兵部尙書行樞密院都承旨政績甚著歸隱古來山所作詩文題曰隱怪者著作大學體卦五十卷

陳塏字子爽龍泉人登淳祐進士歷知太平州兼江東轉運使奏蠲諸郡灾傷發公帑代三縣輸折絲帛五十餘萬復知隆興府江西安撫使平贛州叛卒有功趙必愿上其事遷太平府卿吏部尙書有詔褒其居官清節終資政殿大學士

季鏞字伯韶龍泉人父衍嘉泰二年進士知廬州淮西安撫使鏞以父澤補將仕郎歷任有聲除浙東道提舉知紹興府爲福王所敬景定癸丑任兩浙轉運使上疏言布衣何基早從朱文公高弟黃幹遊潛心濂洛之學真知允蹈暗漏不欺得召補基廸功郎婺州添差教授由是士譽翕歸於鏞除戶部侍郎鏞篤實縝密愛民利國交際士大夫每舉事中節人皆以爲不可及弟鑰淮西轉運判官

陳嘉猷字獻可龍泉人秀悟出人甫數歲日誦千言屬文有奇氣登紹興神童科累官至禮部尙書公忠耿

介有經濟大畧

吳懿德字夏卿慶元人嘉泰二年進士英州教授知玉山縣改知新會縣時邑民狃於訟瀕海多盜懿德至悉心經理事無鉅細必親每新令至有給由錢受訴牒者有醋息錢一切罷去仕族之流寓與惇獨顛連者春貸以錢粟夏多瘴厲和藥以施之廉介有聲進廣州通判未及任而卒卒前二日書於冊曰平生薄宦每受凍餓一介不取一毫不欺嘗祀晉刺史吳隱之於縣東邑人以其介無愧遂配享焉

見新會縣志

吳淇慶元人第進士為戶部侍郎時相欲以淇兼監察

御史淇謂臺諫出宰相薦非盛朝事即謁告出知南

劍州

元 周濬字深伯麗水人少有志操延祐間歷仕至潭州路

經歷陞象山縣尹皆以廉名著

林定老字君則麗水人除奉化州同知遷興化府通判

陸新州知府皆有政績子彬祖登第嗣祖以詩經魁

浙江孫公慶亦領鄉薦

潘弼字良輔麗水人由教官遷除廣東廉訪司照磨公

廉律已發姦擿伏如神為勢要所忌改除贛州路司

獄操守如故

項棣孫字子華麗水人美材藝授奉化州同知官至奉議大夫延平路總管遭世更革恬退家居以壽終

鄭滌孫字景歐青田人宋侍郎如崗子景定廷唱權臣移置未第知温州樂清縣敦崇教化建宗晦書院以淑後學囹圄空虛有嘉禾瑞麥之應異政不一後厯宗正丞兼禮部郎官至元三十年召赴闕寵遇特至未幾乞歸巴里陞集賢學士以病引年不許尋加少中大夫致仕所著有太易法象通贊周易記玩等書

叔習坎書院長孫重祖幼服祖訓默誦九經四書註

五十餘萬言入國學補奉禮郎以苦學疾終葬宛平縣東田至大元年大興府應詔旌表墓廬

鄭陶孫字景潛青田人滌孫弟宋進士充浙東安撫司書機宜文字元世祖徵至闕奏對稱旨擢翰林院編修官會纂修國史至宋德祐末年事陶孫曰臣嘗仕宋宋是年亡義不忍書上嘉之陞應奉翰林文字出爲江西儒學提舉有文集詳一統志

蔣子澤青田人由明經任平陽州判時方谷珍據永嘉瑞安子澤與守臣併力保障一隅民賴以安

趙鞏字安國縉雲人浙東提管知汀邵二州入元爲福

建安撫歷南劍建昌邵武福信五路總管終兩浙運使以征安南功追封蒙城郡侯諡懋康

周明松陽人智力超羣元末山寇作亂明率鄉人勦捕盡擒之於是邑民長幼咸呼周千戶後以壽終於家王鉉翁字中實遂昌人由人材任平江路吳縣主簿轉兩淮都轉運黃巖州判官猾吏久爲民患悉案以法豪強以私忿殺平民吏云不宜問鉉翁捕繫抵罪遷忠顯校尉尋以昭信校尉中山府判致仕

明

葉琛字景淵麗水人博學多才與劉基章溢齊名元季

兵亂從處州守帥石抹宜孫討寇有功授行軍元帥太祖遣使以幣聘之與基溢及宋濂同至金陵帝顧左司郎中陶安問曰四人者何如安對曰臣謀畧不及劉基學問不及宋濂治民之才不及章溢葉琛擢琛爲營田僉事壬寅正月帝帥師至隆興守臣祝宗康泰以城降改隆興爲洪都府尋改南昌以琛知府事既而宗泰據洪都琛迎戰死之事聞帝嘉其忠義追封南陽侯命有司立廟城中歲時祭之

葉現字景龍麗水人南陽侯琛之弟以胄薦至京遇明祖登極試以詩稱旨授通州勾管尋陞府判惠澤及

人復擢南雄太守築堤瀦水灌田萬餘畝至今賴之
稱爲葉公陂後祀名宦

李維齊麗水人由太學試中登甲科拜監察御史洪武
中抗疏極論時政得失調容縣知縣

賴原俗麗水人洪武間爲章邱丞涖政寬裕潔已愛民
凡公出量地遠近裹糧而行遷戶部員外郎見山東通志

俞廷芳麗水人由儒士洪武初知涪州招逋亡薄稅歛
民甚德之又遷縣治新學廟程度皆廷芳所規定見河南通志

陳宗明麗水人任長沙府瀏陽知縣歷溧水所至有聲

陞署廣東布政使致仕復起終於官

吳壽字子六麗水人洪武末由歲貢任監察御史後左
遷旌德知縣廉明有吏才民甚愛之見寧國志

楊仲吉麗水人洪武中辟至京師上問在家何爲對曰
春耕夏耘秋收冬則教子讀書通義理特授崖州知
州及歸惟衣被而已

吳政麗水人先名善才由進士授行在禮部主客司主
事謙謹自持克盡厥職陞員外官至本部右侍郎

周原慶麗水人永樂間由人材初授廣東程鄉知縣歷
浦城江甯皆著聲官至刑部郎畫得青山白雲之趣

又善松石

牛桓字允武處州衛指揮歷陞都督同知沉重嚴毅清
慎忠勤樂禮賢士講明道義兩鎮貴州人仰之如父
母分守江左士民不忍舍屢立戰功寵遇方隆急流
勇退雖致位樞府被服如寒士云

俞英麗水人由舉人授兵部主事陞本部員外郎子端
由父蔭入太學官至知府以孫俊贈工部尙書

金愷字舜臣麗水人善之孫由舉人授霑化學訓滿秩
陞監察御史歷江西廣東雲南按察司僉事所至皆
著能聲以二子文忠俱顯遂乞歸後進階四品

華元凱麗水人

麗志作葉元凱亦云
從山東通志改正

正統間知沂水縣

存心仁恕勤政愛民後卒於官民立祠祀之

見山東
通志

項孔昌麗水人性介直不事邊幅故自號直齋少縈家
事三十三人泮四十領鄉薦授南安訓導雅意作人
捐貲課士士登京闈第皆昌之功分校南闈以至公
稱遷福安教諭賦歸與里之耆彥優游林泉詩酒時
會暇財理先塚修道路人敬重之

薛希璉麗水人由進士除監察御史巡歷有聲陞刑部
右侍郎正統己巳閩寇鄧茂七作亂命征之兼鎮其
地區畫得宜陞本部尙書賚以金帛復勅往山東考

察吏民帖服賜誥褒美進階資德大夫正治上卿

金文字尚德麗水人愷長子景泰進士翰林庶吉士出守開封權豪懾其威重奉敕理南畿獄誣者得雪以沈香木刻像祠之上便民十事詔布天下爲定式著有好事錄履素閒吟讞獄餘興和唐百絕東游稿

金忠字尙義麗水人愷次子剛明宏毅博學瞻文由歲貢入太學領應天鄉薦天順甲申進士授監察御史使車所至聞者披靡值星變疏陳三事皆人所不敢言者事侵權貴坐是中傷繫詔獄謫戍遼東怡然就道杜門著書有甕天稿東甌童子吟

金祺字崇厚麗水人父忠謫戍遼陽祺年二十二上疏乞代不允及聞父故徒步扶柩歸葬以孝稱後登成化甲辰進士授知介州有殺一家六人者獄經七年不決祺承檄鞫之是夕夢老嫗拜橋下指刀處明日水中得刀出示罪人驚服人謂異政歷衡州知府進階亞中大夫所著有避名稿茅齋集

金祺字崇郊麗水人經明行端詩字有晉魏風度舉鄉薦授知亳州寇盜斂跡擢河間同知轉南京左軍都督府經歷忻城伯尊禮如賓師卒於官歸殯惟書數卷

王模字良範麗水人聰敏過人弱冠領鄉薦授淮安府推官刑清民服撫院奇其才委簡察諸郡縣官吏不
小阿縱尋陞鎮江通判不赴歸篋蕭然隱居東郊賦
詩酌酒怡然終老

鄭宣字士達麗水人博學嫺辭剛明通鍊由宏治癸丑
進士以行人選御史綽有風裁抗禮逆瑾謫興化推
官多善政莆人祀之尋陞江西僉事以禦寇功進階
參議乞歸著有宋元綱目郡志補遺古栝遺芳等集
汪瑛字子修麗水人早歲負時望由正德丁卯戊辰鄉
會魁任主事守山海關禁絕常稅拒滅流賊歷遷武

選司郎疏汰武職陞福建副使勦泉州賊會入賀萬
壽卒於途家無贏積所著有抱關稿西巖集

戴鏗麗水人本姓高後於戴以貢授華容訓導蔡系周
者貧而孤且髻也鏗曰是非凡才收而教之旋成進
士有聲臺中世服其知人游陞松溪令有筦庫吏坐
失藏鏗繫獄鏗至閱庫傍地陷一竇循其迹則輿夫
所館也一鞞而服人以爲神

戴濂字希茂麗水人鏗長子孩提喪母賴繼母撫育少
穎異弱冠入泮嘉靖戊午舉於鄉壬戌成進士授行
人移比部慮囚陝西多所平反擢知饒州豪猾干綱

一無所貸萬厯癸酉分校江西稱得人以忤時調簡
潯州府罷牛稅減鹺錢嚴發塚挾贖之禁潯俗爲變
以母憂歸服闋補袁州尋以病乞休年甫及艾父性
嚴毅趨蹌跪拜務得歡心友愛弟妹分貲賚予俾各
成立父卒哀毀盡禮痛母早逝形諸夢寐親描其像
極肖人以爲孝感

呂鳴珂字蒼南麗水人以京闈中登嘉靖己未進士性
孝友厯官中外著廉能聲雖占籍京邸待鄉曲故舊
族屬極盡其情官至工部侍郎以盡瘁卒贈尙書予
祭葬

俞俊字尙賢麗水人才識闕深操持清慎蚤登甲第初
任江陵著賢聲選授內臺振揚風紀陞貴州憲副江
西福建叅知山東山西左右方伯督察旬宣咸有茂
績入爲大京兆彈壓有聲晉少司空海更三任載厯
兩京官至南大司空敷厯中外勲庸卓著壽七十五
顯達考終時共榮之卒賜祭葬

張敦仁字仲子麗水人祖甯父欽俱以明經授教職有
學行仁少瓌瑋負奇弱冠舉鄉書六上公車始登第
初授職方主事守山海關練兵清戎僅五閏月以母
憂歸服闋補武庫復遭父喪以兩次銜卹星奔不及

視含爲恨號慟至忘寢食久之始補武選一切請託
不行出守淮安條上治河方畧拊循貧民摘發姦伏
備兵遵化屯田滇南並著治績遷陝西行太僕卿解
組歸角巾杖履與里耆爲真率會夏則避暑壽元山
中怡然適也

李承勛字錫庸處州衛人幼襲祖職萬曆九年陞軍門
坐營把總因悍卒以減餉要挾鼓噪殫力撫諭計擒
首惡以此受知當道薦陞浙江操捕都司調登萊備
倭鎮守山東調往朝鮮水陸防禦鎮守浙江

呂邦耀字元韜麗水人幼穎異工文詞弱冠登鄉書辛

丑進士選庶吉士改給諫議論丰采取重於時陞河
南學憲校士衡文得人爲盛擢通議封駁得體轉奉
直常歷大理佐禮平刑未竟大用

張榜字汝元處州衛人以祖父死難功廕千戶少業儒
通大義委管團操領兵往瑞安禦倭破賊有功歷陞
松海把總江西都司廣西潯梧叅將勦平狼寇又統
兵往上林三畔等巢征勦猺獞斬獲無算以功陞狼
山副總兵督兵赴朝鮮應援後撤兵凱旋所過秋毫
無犯榜自束髮從戎以至功成雅有儒風身沒之後
囊橐蕭然時稱廉將

續蒙勲字世階襲處州衛指揮多膂力馬上運柁如飛
握兵甌海禦寇九年水陸二十餘戰斬獲三百七十
有奇生擒百餘人聞母病遄歸服闋掌衛篆陞粵東
白鴿門總築兩埠修營房擒倭寇遷都閩合剿瓊崖
黎寇以功陞山西叅將轉湖廣鎮筭兼制九永荆湖
等處在官兩年卽解組歸里平生性果心慈好施周
急施棺藥自號元悟道人壽八十

盧鏜字子鳴處州衛人家世武弁敬禮士夫守備温州
屢擒劇賊許二等及倭兵入寇十餘年烽火不息定
謀戮力俘其渠魁徐海王直等地方以甯厯官浙直

總兵沿海居民祠祀之

盧相鏜子鏜禦倭數十年相未始不在行間勞險之事
率以委相相聞命卽行蛟窟鯨波無少疑憚王江涇
之捷時稱軍興戰功第一相實爲先鋒鏜統烏尾船
勦賊仙居相復爲先鋒克其城徐海之敗也大隅島
主第辛五郎遁烈港海洋鏜遣相邀擊生擒之獻俘
京師摘叙王江涇功授處州衛指揮僉事先是鏜躡
賊九山洋擒其酋哈眉鬚滿咖嘸稽天等并獲其烏
銃機械精利令相竟窮其術至是遂留神機營教習
諸軍功成陞浙江都指揮僉事守備儀真汪直旣誅

其黨毛烈李華山突至石浦入排門聲言復仇瀕海震恐鏗檄相督兵攻沉其船俘其妻妾焚溺死者無算旋計前後斬級功授浙江都指揮以終

樂振芳字秀三處州衛指揮以督漕運功擢參河南戎務管山東臨清都閫後陞至鎮國將軍所在有政績致仕歸農圃自適壽七十八

劉基字伯溫青田人元進士宋將光世裔也聰明絕人沉幾先務初學於鄭復初得濂洛心法於天文地理兵書數學尤極研究屢就元不用揭曼石趙天澤一見奇之以爲孔明魏徵之流而人莫識也嘗泛舟西

湖有異雲映湖水中眾方分韻賦詩基獨縱飲不顧曰此天子氣也應在金陵十年後有王者起我當輔之遂歸隱南田山中客有說基者曰方今海內鼎沸如公才畧據括蒼華嚴明越可折簡而定截江守之此勾踐業也基笑謝曰客休矣天命有待會明太祖下金華遣官聘基基謁帝與語喜曰吾子房也因陳時務十八策適陳友諒入寇勢甚猖獗或謀以城降或以鍾山有王氣速奔據之基曰皆可斬也天道後舉者勝正宜傾府庫開誠款以固士心然後乘便擊之取威定霸在此一舉卒從基策帝欲親攻安豐基

謂不可帝竟攻安豐盜賊四起帝曰我不當有安豐之行舉兵伐漢攻皖城不拔基悉議軍西上率舟師向江州乘風夾擊大破之江州遂平進攻皖城以馮勝守之基承命授勝方畧曰夜半兵至某地有黑雲起此賊兵也移午雲散與青雲接此賊歸也歸則躡之菴不勝矣勝曰諾至則果如所見始神之殲賊而反漢將胡均美約降請禁止若干事帝有難色基踢帝所坐胡牀帝悟許之均美以城降未幾基以母喪歸服闋赴京道經建德士誠入寇李文忠募民擊之基曰勿擊三日賊當自遁已而果然抵京時友諒據

湖廣士誠據蘇湖議者欲先士誠基曰不然士誠自守虜耳陳友諒據上流且僭名號宜急擊之友諒擒則士誠坐破矣帝遂決計伐友諒大戰於鄱陽湖基忽躍起大呼曰難星過可更舟帝急更舟未半晌前舟已炮碎矣久之勝負未決基密言於帝期以金木相尅日決勝帝從之遂平陳氏自是併吞吳會席捲中原混一四海皆基策也帝每與基密謀必屏左右故人無知者一日侍帝見日中有黑子奏曰東南當失一大將參軍胡深果以敗沒聞帝方刑人以夜夢告基基曰眾字頭上以土付之不三日得土得眾之

象三日海寧以城降洪武改元拜基中丞御史章溢
奏定處州稅糧帝特旨青田五合起科使劉伯溫鄉
里子孫世世爲美談旣而帝幸鳳陽命基留守首劾
都事李彬侮法誅之李善長素厚彬大與基忤基乞
歸田里陛辭曰鳳陽雖帝鄉不宜建都王保保雖可
取亦未易輕也後定西失利王保保竟走沙漠初南
京建宮闕基築前湖爲正殿立椿水中帝嫌其逼少
徙於前基怪問之帝曰我也基默然良久曰美矣但
後世不免遷都耳帝念基手詔召基還京曰劉基識
朕於羣雄未定之秋動則每匡治道靜則每觀乾象

發縱指示往無不克今天下一家同盟策勳著鞭一
來朕心悅矣基入朝進基公爵固辭不受封誠意伯
帝欲相楊憲基素厚憲曰憲有相才無相器帝曰汪
廣洋何如基曰褊淺難語休休有容胡惟庸何如曰
小犢將償轅矣帝曰無踰先生基曰臣嫉惡太甚且
厭繁劇用之尤負聖明夫宰相者持心如水以義理
爲權衡而已無與焉天下何患無人如目前諸人未
見其可也惟庸聞而銜之基又乞歸惟庸乃教人上
書誣基善相地彼有地曰談洋據山面海有王氣基
欲得之基入朝引咎帝不問後惟庸入相基嘆曰惟

庸當國左袵殘民奚堪此重困耶遂憂憤成疾帝遣使送基還鄉經一月薨未續之前以天文諸書授子璉使獻於朝曰毋令後人習也又謂仲子璟曰我死後帝必念我爾乘此機以我遺稿上陳帝詔付史館基在朝則剛毅而慷慨歸鄉又恂恂若無能帝雅重基嘗呼爲老先生而不名又以文章爲當代首稱云著作甚多見藝文志長子璉有父風帝欲大用之擢監察御史尋擢江西叅政卒於官帝哀悼甚親爲文祭之遣使護喪歸鄉

厲子温青田人以明經擢監察御史糾劾不避權要洪

林武癸丑命踏湖州水荒以實復明上曰先日無爾獨曰有莫不知所以者乎對曰天知地知臣知君獨不知帝忿其言不遜斬之後果如其言因御書於午門曰豪傑御史厲子温

留衢青田人由舉人初任德州教諭陞全椒知縣全椒苦海運衢上疏濬漕河民甚便之丁母憂歸哀毀過甚遭羸疾卒全椒父老爲文抵家祭之其後裔曰宰宏治歲貢曰九齡任主簿

王均字惟準青田人丁未會試前一日聞父訃卽號躅奔喪聲徹晝夜聞者悲之時士中有冒服售第者或

謂之曰盍少忍圖一榮捷均泣曰是何言哉任濱州知州歲大旱民無種子流離滿道均躬履村落貸種給耕又請於朝得銀萬兩民賴以濟歷官九年宦囊如洗父老扳留繪分耕圖以贈

梁以孜青田人洪武乙丑進士任永城縣丞政聲上聞朝命法司給榜任所及原籍褒之有梁以孜乃賢人君子貪官污吏毋得妄指贓私之語

潘徵字德韶青田人讀書有大畧洪武間以老人朝觀至京特旨授中順大夫署北平布政司事
林伯光青田人由賓貢任邵武府簡校故事建甯運糧

發邵武軍由陸道送納甚艱伯光曰自建甯達延平水道甚便卽疏聞罷其役民甚德之喜吟咏多關世教嘗有詩寄子曰報國事君吾不易治家教弟汝尤難著有觀光集實錄誠

項昌銘青田人由明經舉任利津縣有政聲陞知定州遷耀州博通經史爲文章多理致有中山吏隱集

陳彥思青田人端謹博學善詩文初任光華主簿有善政縣東有神民破家賽禱思至題詩於廟曰神道自然明禍福何須詔瀆費千金我來亦與民爲福料必神心契我心親老告歸永樂間召入勅知餘姚縣著

有舜江吟歸田集子竄入太學授臨淮知縣賢能累著九載擢南甯知府興利除害士民懷之祀名宦人謂父子二循良云

陳詔字廷詢青田人少英敏絕物日誦萬言以書經魁永樂庚子鄉薦中宣德庚戌春闈第一除監察御史遷四川按察副使時閩浙盜發溫處屠掠尤甚上知詔威望且諳民俗拜都察院僉都御史命巡撫浙江勦平山寇詔至諭以利害不煩寸兵寇悉平復命陞見賜賚甚厚將論功崇爵一夕疾作遂卒

葉仕甯字處道青田人清慎博洽由進士歷官儀制郎

中遷陝西叅政贊軍務疏上致治推本十事忤執政貶交趾叅議因道梗莫進出鎮淮安提督漕運竣事調山西平江伯奏留淮上事完復差口北處治戎務宣德間遣使齎勅賞以銀幣著知非集

陳中州字洛夫青田人詔之曾孫敦樸好古務爲高奇自弱冠應試屢列高等所作文論遠近誦法貢爲廬江教諭復除玉山以興作人文爲任往與永嘉張少師游好及上銓選張令作清馥殿賦將薦授館職不屑就作詩諭之曰上馬伏波還未老下車馮婦也堪羞人稱其正氣歸來結一室依古木下自號依樹老

處州府志卷之十八
人又稱太鶴山人又嘗自題小像曰髯白子生何暮
不請無一遇動與世違靜如泥塑人以爲癡天然之
素謝多歧之迷取一竅之悟大明平世之民義皇上
人之步咸謂實錄云著述甚多見藝文志

葉瑞齡字仁夫青田人由歲貢任漳州經歷素性剛方
學問該博居官涖事不色喜愠署邑篆善綜理人稱
廉介乃行與世違浩然乞歸所著有禮記柏說杞憂
畧春秋張藏於家

劉世懋字國昭青田人文成公十一世孫秀穎醇雅尤
工翰墨以恩貢授定南令地近獠俗人不知書爲創
學以教之清丈田畝百度維新再補通道令歲飢出
粟賑貸民賴安輯粵民就哺者一體撫卹全活甚衆
擢瓊州別駕奉檄征黎脅從者不妄殺戮洞夷賓服
以犯瘴厲乞歸道遙林下以壽終所著有蓮城詩稿
藏於家

潘大熙字時雍青田人幼力學長雅負名節以明經倅
江西吉安倡講姚江之學多士翕然從之攝永新興
邑西水利減虹橋商稅移瓊州別駕會田疇荒損清
丈平賦人服其公署崖州有生熟二黎爲貪墨科取
香藤抱由羅活爲叛連年征討調廣西狼兵運籌措

餉事平叙功陞麻哈州知州致政歸隱西湖結竹林社以壽終著閒居漫草及珠崖小稿平黎集隨筆行世

王敦仁字壽崖青田人孝友謙和家貧力學幼割股療母疾以明經授平陽訓歷邵武諭台州授沂州學正所在有作人聲陞常州府判多惠政署無錫篆傷高攀龍被斥遂解組歸性耿直鄉族事咸取衷焉壽九十卒

趙垣字伯和縉雲人洪武初耿再成駐兵於貴龍山引爲叅謀後知羅江縣民俗獷悍推誠慰撫卒化其心

遷琪縣嘗旱蝗垣持耗苗禱於城隍請身當其災忽有靈鵲銜苗而去須臾大雨蝗滅歲復大稔所著有

琴鶴集

施泌字叔源縉雲人由儒士任漢州判官性敏學博爲政有聲

朱惟嘉縉雲人調盧龍丞有政績遷國子助教早從番禺朱公遷學有源委爲時名儒所著有素履集十卷
盧道徠縉雲人舉孝廉知建德長陽崑山常熟四縣以廉能著名

應暄字伯和縉雲人洪武初由儒士知太康縣大著廉

謹名以叅政周尙文薦陞吏部員外郎嘗以事落職
兵部尙書王純薦知荆門州治尙寬厚民多德之永
樂中致仕荆門州志謂其廉以律已寬以治民州民
頌德久而不衰又見彰善錄

楊燧字尹昭縉雲人由進士除刑部主事轉監察御史
以清直著名工詩文及晉書法

樊敬字公慎縉雲人洪武中任金華府學訓導行誼純
正學者宗之永樂四年應詔修大典陞工科給事中
小心慎重糾劾不避權貴及掌科事與公卿叅議大
政建明居多直登聞院數奏枉抑多平反陞江西右

叅政所著有慎齋集

王鍾縉雲人洪武中由監生授廣西按察司僉事發姦
摘伏凜然有臺官風采

陳祚字永錫縉雲人由進士授刑部主事終福建市舶
提舉學問該博爲政有聲

趙璉字仕瑛縉雲人穎悟勤學弱冠善爲文下筆輒數
千言授監察御史發姦摘伏如神嘗署都臺事百僚
震懾尋陞荆州知府所著有復菴集并和杜詩三卷
徐善縉雲人授大理寺評事持法公平祭祀每求白兔
民苦艱得奏以白雞代之衆謂得孟子簿正之意遷

陝西僉事董學嚴課守慶陽戎獠不敢渡

李璽縉雲人忠直多大節嗜學博洽任重慶府推官公廉仁明不勢怵不利奪有弟殺人賂坐其兄者廉知之竟罪弟銅梁有亡寇囚其父母妻子者經年璽曰罪人不孥釋歸農寇聞感激自赴三年考最囊篋蕭然還家鬻業充行資擢知趙州苦節惠民甫五月卒趙人巷哭家莫建仰德祠以祀之入名宦所著有一泉集倅渝集就正稿

陳悅縉雲人咸寧知縣聰慧博學愷悌直方省試第一與余本諸公並稱知咸寧時作教民榜多善政百姓稱真父母未幾卒於官巷祭路哭扶櫬至家者百餘人

李珉縉雲人持心淳實任延平推官鞠獄明允有父訟其子者其孫曲護其父珉曰爾知為父之子不知父亦祖之子也三人相泣階下去聚賢里好訟訪其訟師痛懲之訟為頓減尋遷撫州別駕時洞寇出沒布德惠嚴規畫境上肅清僅四月致仕吟咏歸來於世事茂如也

曹進得縉雲人明師征金華進得為書上曰惟皇建極重開日月之光俊民用章復闢乾坤之大明祖嘉其

言遣從樞密院耿再成麾下率驍騎十八人屯營黃龍山募民兵得萬餘人民皆悅從

樊觀生字進德縉雲人善騎射多謀畧洪武初為縉雲伯胡深叅謀授處州翼鎮撫從征福建厯建甯燕山平陽成都四衛以武節將軍致仕

李鍵字延守縉雲人品端學正初任繕部董三殿大功以勤廉著稱有題覆稿六册存部晉光祿少卿疏歸省親陳職守十事禮工二部逐款覈行擢南納言以侃持宗藩事儀忤權要左遷時應天巡撫海忠介公雅符志行疏乞守蘇值歲凶設法賑饑入覲不如例

餽遺又議官屬忤執政遷長蘆使撫竈釐弊冰蘖自持商人春秋祀之晉四川大叅念親老厯疏乞養歸日優游大小仙都間無尺牘抵長安隻字干公門生平好讀書慎言動衾影無愧至於孝友清貞尤天植其性年九十有一臨終賦詩而逝所著有賜養堂詩集祀郡邑鄉賢

李棠字宗楷縉雲人宣德丙午經魁庚戌進士遭父喪水漿不入口者三日服闋拜刑部主事治獄必求其生而不得然後論如法時廷臣建存省公儲之議詔六卿甄部屬視優劣進退之尚書施禮恐招怨以入

廣州府志 卷之十八
官先後爲去留棠遂需次南還抵金華囊罄從者以告棠曰家近矣何慮哉既歸事母承顏順色起補刑部上降恤刑典勅法司簡公勤詳慎者分泄諸道以南畿地廣獄多遂屬棠陛辭時矢曰茲行苟取人一介當不生還道遇故人沈樂安蔣水部以繒纊銅蟾蜍靴襪見餽悉卻之沈以蟾蜍爲清物強置於舟而去乃投諸水所至公平復命部有某衛刁軍誣千戶劉某謀逆少長男女皆下獄連坐者數百人悉爲直之陞本部右侍郎奉勅巡撫廣西勵士勸農清刑革弊桂林有靖江王府悉裁以義又粵地羣獠素叛服

靡常棠討捕招徠威懷並施未三年獲俘馘萬計給還民男女踰千朝廷嘉其勲命兼提督征蠻軍務事仍有白金綵幣之賜都指揮黃瑛殺其胞兄士官珮并其二子棠執之瑛在獄設計上疏易儲用事者允之反陞其秩棠鬱忿成疾因乞歸壽六十一卒欽賜祭葬諡恭愨

虞瑤字邦瓊縉雲人第進士官給事中性耿介知國體成化時以進言忤昭德宮下懿旨將置之死同列爲擊登聞鼓救免中貴盧永督採處州鑛課甚橫瑤入告得罷民困始甦終兵部侍郎卒賜祭葬祀府鄉賢

祠

周南字文化縉雲人成化十四年進士除六合知縣擢御史出按畿輔宏治初再按廣東劾總兵官柳京厯江西右布政使擢右副都御史巡撫大同武宗初立寇入宣府叅將陳雄等邀擊敗之錄功增南俸一秩母喪歸正德三年劉瑾擅政以大同倉粟有泄爛者逮南及督糧郎中孫祿下詔獄械送大同責倍輸會赦大同總兵官葉椿等爲請免其倍數輸畢釋爲民瑾誅以故官撫宣府不就明年起督南贛軍務南贛巡撫之設自南始汀州大帽山賊張時旺黃鏞劉隆

李四仔等聚眾稱王攻剽城邑延及江西廣東之境數年不靖官軍討之輒敗推官莫伸昭知縣蔣璣指揮楊澤等被執賊勢愈熾南集諸道兵擊之龍牙禽時旺義民林富別擊斬鏞於鐵坑其他諸砦爲指揮孫堂等所破而副使楊璋僉事凌相等亦擊隆四仔禽之先後斬獲五千人伸昭等得逸還捷聞賜勅獎勞南乃移師會總督陳金共平姚源諸賊境內遂甯九年春進右都御史總督兩廣軍務踰年乞歸卒贈太子少保

李寅字敬之縉雲人清廉鯁直由進士厯官至廣西布

政立石自誓時應得羨餘銀一十三萬解部無私告
歸行橐蕭然壽百餘終書紳云身既許國生無補恨
不除奸死不休其忠貞類此所著有暘谷空音行世
李瑜字良卿縉雲人嚴毅清貞登經魁第進士累官司
空司寇郎向誠意伯奪爵被誣瑜抗疏力陳開國功
始克復陞鳳陽府知府告歸韋布山林有大事必就
瑜論定人以公正推之

樊獻科字文叔縉雲人嘉靖丁未進士行人陞御史上
疏蠲近畿賦按福建值島氛倂擾時缺巡撫指授方
畧以安八閩將復命民千餘詣闕疏留得遲代二年

閩人立祠祀之官至叅政比家居侍養甚周既厝築
室墓側所著有讀史補遺詩韻音釋旅遊山居吟稿
祀鄉賢

鄭文茂字實夫縉雲人嘉靖癸丑進士授刑部主事執
法不避權貴人不敢干以私恤刑江南多所平反歷
本部正郎出守承天抑中貴驕橫裁儀贖庫徭多善
政遷四川兵備副使勦巨寇何勉等逐貪墨革支應
民歌頌之四十歸隱絕迹公庭二十餘年所著有性
理輯畧審錄疏稿祀鄉賢

盧勳字汝立縉雲人敦睦樹範恬澹禔躬以博士起家

歷司諫嘗劾權姦世廟嘉之有真給事之賞修顯陵
革侵漁省百萬之費撫南贛潢池甯謐典北棘嘉石
持平陞南刑部尙書引年致仕家居杜門謝客克嚴
庭訓蔭二子年八十神廟遣使存問賜階一品祀郡

邑鄉賢

鄭子壽字邦德縉雲人文茂長子性孝友聯捷名魁授
合肥知縣革火耗禁雜派斥庭實修建龍門等坊興
釐軫恤五閱月化洽四境卒於官肥民爲建哀思祠
入郡邑名宦著有易經四書心傳會說漱芳堂稿

李陽吉字廷謙縉雲人勤學篤行鄉薦時縣徵百金以

餽因歲饑不受授廬江令建城垣革替稅丁母憂哀
毀骨立以孝聞補枝江緞民戢伍循良首薦及歸囊
橐蕭然所著有易經口義

鄭汝璧字邦章縉雲人登隆慶戊辰進士授刑部江西
司主事累遷雲南司郎中時尙書石首王之誥精於
察獄稱其才可大受張居正當國聞汝璧名調儀制
司故親藩名封屬儀制諸掾役納賄習爲常世宗自
興藩入繼大統嘗歎息曰禮部好一王府科汝璧縉
舊牘定畫一制具草尙書宜興萬之俊奏行之儀部
稱肅清焉乙亥調驗封郎中丁丑大計外吏以黜不

及州府志 卷之十八
三
省爲務有一二犯公議者方走首揆門自謂立致開
府榜出竟黜聞者快之轉文選卽日題推典吏故給
事中趙泰魯超擢福建提學僉事時江陵當軸汝璧
在選司力裁抑楚人又嘗以正論格江陵江陵亦悉
委以選事是以得行其志所推舉悉當輿論踰年遷
太常少卿出福建右叅議一年遷廣東副使轄瓊州
汝璧自列卿出又嘗典選遠麾海外鬱鬱不樂遂抗
疏歸養家居十二年起井陘兵備副使遷赤城叅政
轉河南左叅政明年遷山東右布政代孫纘巡撫山
東活饑民六百三十萬有奇丁父艱歸起南京太常

寺少卿居三歲仍以右僉都御史巡撫延綏乙巳遷
兵部右侍郎兼僉都御史總督宣大山西軍務廕一
子監生時虜王死應襲封者方遠牧西海上諸部落
觀望莫敢動有窺伺越封者詭其迹東西跳梁眾情
懷疑諸將帥按甲待汝璧至檄諸道修城堡練士卒
治器械間召故大將麻貴董一元議用奇出勦之畧
置封貢事不問諸酋矢志計窮會汝璧疾作乞歸卒
於山東荆門驛以延綏軍功廕一子錦衣衛百戶世
襲恤贈如例汝璧明法家言在西曹有律解有五經
旁訓撫山東刻行儀制刻帝后紀畧同姓諸王表功

臣封爵考臣謚類鈔家刻有由庚堂詩文集皆行於世

李如桂字允芳縉雲人萬厯己酉中浙江鄉試第五與父後先以三禮魁兩浙授青陽知縣郤里供汰冗役清羨耗飭宮墻考成陞南京西城兵馬指揮洗積年陋規擒大盜設糴賑饑陞南刑部主事冰心水鏡多所平反卒於官所著有禮記宗旨

陶良性字以循縉雲人標之孫博通詩書尤精韜畧以功授南昌府通判適倭犯朝鮮經畧大司馬邢公玠廉其才奏改永平列銜督餉朝鮮悉心籌畫動中機

宜恢復屬國陞灤州守方奏凱以勞瘁卒於途邢公上其事贈四品進階朝列大夫官其二子學夔世襲處州衛百戶起翺襲指揮僉事

李銖字廷新縉雲人清貞耿介嚴密端凝強仕甫登第任比部執法平允以艱歸居喪哀毀盡禮服闋補北職方郎推舉武職雖貴近請託不徇己丑分考督學粵西並稱得人總憲山東倭寇釜山簡任淮揚巡撫時權使四出民心動搖兩疏以去就爭時論危之屹不少動旋以大計自陳部疏留用爲司寇及御史大夫三掌邦計中外翕然卓有古大臣風年九十餘哲

皇遣使存問卒誠子孫恐負國恩母求卹典恐人溢
美毋求誌銘自述數語命置幽窆中上悼老成五典
全錫學使鄒公嘉生企慕高風令有司祀郡邑鄉賢
所著有三游稿奏議錄樂泌堂文集恩休記贈太子
太保諡貞肅

鄭士毅字仲仁縉雲人以父功襲錦衣衛百戶累陞僉
書時權璫魏忠賢肆虐田爾耕許顯純等媚璫怙惡
號爲五虎士毅恬然處之託於醉以自全崇貞初璫
等伏辜時拔掌衛事加授柱國榮祿大夫左都督三
王就封毅護衛沿途約束軍士絲毫不擾回衛卒於

京少時負文名中乙榜著有破萬自娛集

李維喬字希遷縉雲人矢志力學公車六上始授萍鄉
令置買會田五十畝剏天香藝苑以課諸生議撤稅
罷鹽戶裁坊役陞廣西平樂江防同知念二人未盾
遂挂冠歸襄大事薦賓筵再年踰八十天性孝友博
通經史及天文輿志諸書

李兆齡字懋仁縉雲人丰姿魁偉學問閎博久困棘闈
以恩選授烏程訓陞西安諭以薦陞江西大庾令廉
恕爲政頌聲四起幾三載卒於官士民哀慕範銅肖
像祀之所著有適適草

李錦字廷實縉雲人讀書忘寢食精舉業爲太學生應
順天鄉試中乙榜授宛平丞以存愛二字爲額清慎
守職不憚豪勢有富民殺人者歷十數官不能決錦
一簡而辟具時建三殿縣報大戶致首揆書於尹求
脫尹從容語錦不答復以首揆挾公亦不屈蓮花販
石派縣錦稟當事者免之京師謂錦一言省民資數
萬陞沔陽州同知惠政淪洽念父老挂冠歸養絕跡
公門先是承天油蠟庫子賦重如遭湯火遺書太守
鄭公文茂爲罷賦役生平好吟咏甘淡泊舉賓筵五
所著有我泉稿林居吟稿

鄭日強字邦寅縉雲人幼時父誘之學緡閱卽能記誦
喜讀漢書尤工書法母卒水漿不入口者數日萬歷
癸巳以選貢入北雍丁父憂歸服闋謁選授崇仁丞
書素位二字於署誓飲崇一勺水也奉上讞兩造稱
平督撫衛公重其清望委之盤倉權稅章家石秋毫
無染攝東鄉樂安二篆治行循卓臺使列之薦剡以
瘁卒於官著有易經家說四書鏡哦松草

李淑字汝慎縉雲人愛篤孩提學該墳典入太學授崇
明縣丞治齋則赤籍唯明巡海則潢池永謐捐俸助
賑解任歸斗酒聽鷗百篇倚馬屢薦賓筵所著有凝

翠閣稿

李思謙字含虛縉雲歲貢授永嘉訓陞甯國諭轉貴州清平縣撫輯苗民接濟兵餉縣爲黔中要區道路崎險往來病之爲捐俸修治二百餘里人頌德不衰尋以水土不合告歸

盧點字子與縉雲人貞亮孝友莊敬端凝不徇時好孤高自飭薦鄉書授刑部司務歷比部十年止攜一僕布衣疏食持三尺以平反人莫窺其言笑出守桂林嘗簡兵以備寇興教以掄材家居二十餘年公庭無餽謁世業無更增傳家唯圖書數卷而已

李正開字汝茂縉雲人少穎異博涉經史以貢入太學授秦州判監督鎮番有惠政父艱歸起補遼陽值時多警忠義激烈晝則召募夜則巡警上安邊七策當事以爲書生言不用歸來雅自樹立鄉事有不平者以質開一言而解所著有兩邊記畧伍草子稿閒軒集

李逢雷字子敬縉雲人賦質敏異博涉經史善註疏長詩賦與人恂恂無忤事父母至孝以例貢授光祿寺署丞陞遼州同知署州事治在萬山多曠土因勸民植茶果墾土田應罰鍰者視墾畝多寡爲差民爭畢

力得田數千畝事聞擢陞福建鹽運司副至則飭竈
丁禁私鹽不畏強禦不總貨貝又捐俸以助貧士陞
榮府左長史未任卒所著有三畏箴饌玉稿

李正員字奇石縉雲人少穎異目可十行以明經任宜
興丞廉慎勤恪陞遼東經歷鞅掌不遑多有裨益積
勞成疾卒於官

樊經邦字翰屏縉雲人由廩例授福建鹽運司經歷清
約自守不受商利

樊宏聲字震圓縉雲人由歲貢授石城令邑素難治前
令屢罷去聲泄任六年捐等耗息詞訟課士勸農行

所無事有鳴琴之風陞賓州知州不赴而歸

王景字景彰松陽人修癯美髯洪武四年與楊宜同中
鄉試授懷遠教諭陞開州知府以考再陞山西右叅
政無何下吏以糧撓法累謫滇南靖難師起會赦至
京師成祖繼統擢爲翰林學士建文帝大內自焚成
祖問葬用何禮景對宜用天子禮上從之一時詔勅
皆出景手景居官立朝不受鄉謁知者謂其才高用
是以自晦耳一日上欲出師值大雨上不懌景從旁
語曰乃上天爲陛下洗干戈耳左右不辨其語衛士
竊奏之上悅擢爲親軍指揮使後徙居池州銅陵縣

周德問字漢傑松陽人通書史精武畧值元季寇亂率子弟保障鄉邑明師下括蒼辟德問守禦處州復合軍數萬東取甌城屢立奇功論功不受退休家居捐資築白龍堰灌東鄉田數百頃人享其利

葉廷敏字遜學松陽人永樂中爲太學生成祖幸學講康誥克明德章次及天命之謂性章大悅之令獎錄勅同兩淮巡鹽監察御史薛公僉書時兩淮歲額頗重廷敏懇奏減鹽稅數千緡准人德之侍御將畢事病卒聞於朝成祖勅云著監生葉廷敏了事罷廷敏奉勅守法無阿避復命歸家遂隱居教授杜門不出

有留耕集

周華字斯榮松陽人以賢良方正知武安會朝命覈實額華乃與簿議武安土瘠賦重則傷民命遂實封以聞執政謂其變亂成法下獄有旨問所言出於簿乎對曰臣獨爲之簿署名耳竟坐法後武安直衛士十餘伏闕呼救上感悟復其官拜兵部郎中

包公貴字搢圭松陽人貢入太學授岳州判勤敏廉慎陞禮部郎中以外艱歸起補工部時國繕造徵材西川先是皆爽期坐法貴領事不疾而速人以神目之竣事告歸加四品秩家居躬耕清苦有古廉吏風

王繼行字同倫松陽人已卯鄉舉授廣西道監察御史治最陞江西僉事冰蘖自勵秩滿疏歸僚屬多以旛帳送之帳裂其文旛留其竿餘盡卻之

王成字允功松陽人貢入太學授監察御史偕工部爲勲戚劉大秀等樹碑成後至觀碑次不合於禮入見上曰劉汪二氏雖勲戚乃臣子耳不可與高皇帝碑並立必遠數十仞庶君臣之分明而報功之典盡矣上嘉之一日又曰王成好御史勅命南都簡治成牘核官吏能否京師肅然

詹景威松陽人尙氣節敦行誼鄉舉中乙科訓晉江誠心作人將擢風紀以上封事忤權奸左遷夏邑幕邑民流亡將謀不軌威至單騎入諭以義毀砮復業隸籍編爲民等以艱歸起補諸城地久旱蝗官稅積十二年不能入民竄過半乃抗章乞貸設法捕蝗民盡復業長令政稍曖昧卽正色請改陞安福簿令敬其才勸曰君所至皆得民少順上可大用矣威曰吾強仕所以報君親行已學也若屈節取寵不能乃乞歸憲臣交章薦之俱弗顧

周雷字時敬松陽人由歲貢判延安出鎮神木督倉廩謹度支崇學興教恩威並行地接北虜數被侵掠乃

相度地宜築堡防禦潛使人掣其馬虜懼不敢逼又地高乏水人多病渴令各鑿井利濟無窮及歸民皆遍道泣餞林下三十年無暴色疾言邑政有利於民者輒直陳之

詹雨字天澤松陽人英敏好學有襟期時值兵燹家造抑鬱養親務適其志父沒哀毀癯瘠喪事循禮雖上有五兄不少俟分勞有弟寶幼盡心撫育授以經業遂相繼登第雨初拜兵部主事清親軍宿弊與汪直忤出守建昌雅多惠政尋丁內艱哀戚嬰疾起守韶州抑權門平瀧水積盜官至廣東左叅政謝事家居

修祀禮講正學誘後進人至今誦之

毛文邦字希周松陽人嘉靖庚戌進士性行謹厚歷官刑部郎中讞獄多平反卒於官幾不能殯士類仰其清苦

詹寶字天球松陽人叅政雨之弟由進士令新昌侃直廉明慈祥簡樸秉法而權右斂手盜除民安士大夫勒石頌德林居有靜齋集

詹世厚字敦仁松陽人孝友博洽以恩選爲南大司成所器令永春冰蘖自持搜弊剔蠹轉祿勸州守開學立市夷人悅服兩地立祠建碑

毛汝科字孟甲松陽人幼有異質常懷遠志克敦實行以明經訓淳安諭樂會皆先行謹後文章攝會同篆以清淨為治無重刑厚斂吏習民安謳歌載道遷惠州授士民渡海遮留格於例不果後卒於官囊橐蕭然

劉燿字憲卿松陽人判泉州廉謹愛民多惠政攝南安同安篆清耗釐蠹署海防殲巨寇鍾斌歸休太史蔣德璟司銓林徹昌為著甘棠集居鄉尚義倡建學宮置學田遇荒歉出粟賑饑造橋修路累登賓筵以壽終

黃道俊字彥傑遂昌人元末綠林賊起閩浙驛騷道俊與兄道侗弟道傳倡募襲之賊遁走銓授松陽副簿洪武初道俊復以才畧徵授襄陽同知調吉永豐丞有政聲

蘇民字天秀號乙峰遂昌人洪武初大封親王博選東南巨族以充侍衛民曾大父與焉時從愍王之國遂為秦人宏治乙卯舉陝西鄉薦乙丑登進士初授山西榆次知縣徵為兵部職方司主事逆瑾擅權不附落職為四川梓潼驛丞瑾誅復官工部歷吏部考功文選郎中上疏諫止武宗巡游罰俸後陞南京太僕

少卿歷工兵刑三部侍郎卒贈尙書清修自持所至

以廉幹稱翰林陸深爲之狀

見獻徵錄

時哲遂昌人正統間礦賊突攻縣治哲散金募兵率弟誌邀擊於麻車嶺誌死之哲力戰賊卻郡司上其功授馬步司巡簡

周德琳字廷獻遂昌人由進士除刑部主事歷郎中廉謹平恕不阿權貴正統間清理江西刑獄多所全活陞雲南布政司叅議時宦官金姓者要其一見以美官誘之卒不往遂乞歸

葉雲字民望遂昌人由歲貢除江西建昌府推官砥礪

名節居官廉介捐俸修曾南豐祠執法忤當道遂懇致仕居家甘貧有司以蔡相公廟基地遺之計直數十金辭弗受湖山所建鳳池書院卽其地也

黃中字文卿遂昌人穎異不凡由乙科令鉛山冰蘖自勵一意保民弋陽業奪驛馬誓棄官復之省歲供千數百金召入爲御史出按晉滇及留都持大體多異績補天津兵備妖人張道仙聚眾數千爲亂一夕繫而殲焉招集流移歸業者萬戶著述有西野奏疏南窗紀寤集吹劍集易經紀蒙

吳孔性字粹卿遂昌人嘉靖壬戌進士器度純慤篤行

孝友任刑曹贊決大獄簡刑密雲多平反守安慶定
兵變著節愛聲備兵閩漳禁市舶肅清海甸歷雲南
叅政致仕居家分產二兄賑施宗黨修譜牒祀祠宇
所著有管見訓俗等書

鄭秉厚字子載遂昌人嘉靖辛酉鄉薦第二隆慶辛未
進士始令南豐撤悍兵均田賦人頌神明入諫垣彈
劾權貴直聲大震副憲閩滇持風裁殲叛賊糧儲江
右節用通濟區畫悉宜以督運勞終於淮次有奏疏
文節

應槓字子材遂昌人學問純正才識練達嘉靖丙戌進

士授刑部主事歷郎中奉使南直隸恤刑平反獄囚
全活者衆出守濟南歷常州寶慶辰州卓有風力常
州有去思碑尙書許讚稱爲天下知府第一擢湖廣
提學副使遷山西巡撫會畿甸有警卽先諸鎮入援
朝廷嘉之錫以燕賞陞兵部侍郎總督兩廣一時咸
盛稱之以征七山之勞感疾卒訃聞贈兵部尙書遣
官祭葬所著有慎獨錄讞獄稿大明律釋義等書行
世崇祀鄉賢

鄭一舉字應科遂昌人儀容偉岸動履端莊由選貢授
四川西充知縣廉明仁恕崇學慎刑庠士多所造就

成獄重囚得平反者四人郡守饒公景暉目爲循吏
直指趙公標稱曰福星致政家居捐資賑族厭世俗
紛華躬行節儉爲鄉閭之表率云

黃一陽字旋化遂昌人九鼎之弟萬厯癸酉選貢授滄
州判築堤理鹽極著茂績庚戌發銀賑畿輔民設策
分給時稱惠政陞藤縣令地產異草食之立死惡少
每恃此誣人下車首著爲禁在任二年鮮有以人命
訟者告致不允卒於官所著有岳立軒稿

鄭九炯字美中遂昌人萬厯壬子舉人授靈壁縣邑當
南北孔道輪蹄絡繹供給浩繁裁夫役革火耗葺城

堡平盜寇修學宮旌節孝士民德之陞江甯京邑治
如靈壁發舊令任內奸吏侵欺錢糧一萬零遷刑部
主事清查淹禁全活者衆附列考選上疏抗陳銓政
以躡治刑曹謫降補德安推官肅清囹圄多所平反
遷工部主事念母逾九旬致仕歸養

尹思忠字蓋卿遂昌人起莘先生裔其先以扈從入京
世籍錦衣四傳至思忠豐儀博學早遊膠庠相者謂
其貌當以武貴乃投筆登萬厯丙戌武進士擢守鴈
門官至山西分閫天性孝友愛士卒言行取予動合
古人談詩說劍有儒將風給事張貞觀閱邊聞思忠

賢虛心諏訪條上六事皆籌邊大計邊人誦之

項應祥字元芝遂昌人森長子萬曆庚辰進士初令建陽勵志冰蘖力雪冤獄縣志有抱案吏從冰上立訴冤人向鏡中伸之語復補丹陽巴縣調華亭主勸勢惡定以大辟聲震南都擢司諫有翼儲請冠請婚七疏功在國本掌天垣秉公矢慎海內想望丰采時南北黨興挺然不阿甘心者思欲中以奇禍遂假妖人書誣蠆之賴神宗鑒其素赤終始無他捐俸給養士田三百石方伯溫陵洪公啟睿爲之記贍族田三百石義塾田五十石累陞應天巡撫卒於家祀鄉賢并

祀建陽名宦所著有問夜草醢雞齋稿國策膾行於世

項應瑞字儀明遂昌人森仲子萬曆戊子鄉薦以兄應祥兩分考南宮迴避乞署建陽論丙午聘江右分試陞盱眙知縣邑當南北孔道無城郭倉庫獄司防守爲難盡心拮据僅一載調建甯革火耗裁里甲以廉明簡易爲政遷蒙化府同知遂賦歸放情棋酒不問外事長子天慶辛酉舉於鄉後二歲乃卒臨逝賦詩未必南面樂未必刀山苦魄散魂自升茫茫還太古精爽不亂識者偉之

朱文盛字用化遂昌人爲邑令池君浴德所知授仙游合浦倅歷寶慶桂林幕所至百姓安之在寶慶時節推丁公啟睿有疑獄力平反之丁亟稱於御史有守身不染一塵折獄立服兩造之薦家居三十年凡鄉族諸事悉爲處分不抵郡縣壽逾八旬兩薦賓筵

項天慶字六吉遂昌人性倜儻不羈多與親族長者忤由舉人授武涉令迎吏至都門贖金二百爲行李資天慶艷然曰此何名徒累吾民耳卻之下車邑民頂香迎候益自矯厲終以傲放不諧於上解綬歸

徐志雄字士英遂昌人授上海丞海俗尙氣習侈有打

行鬪寶兩陋規往往欺懦致傷人命啟寇劫奪志雄力請革除地方以安又築城濠禦寇翔黃浦渡多善政以親老歸養待族戚有恩義助學田司李袁公重之勒石學宮郡侯陳公旌爲宦林清品年七十有五無疾終

章盜字三益龍泉人受禿堅不花請屢平蘄黃等盜有功一官不受結廬匡山歲庚子太祖召見金華曰我爲天下屈四先生無何擢僉營田司事一日母病鬱鬱不樂帝厚賜歸省留其子存厚於京續處州總制胡深出師温州詔盜守處州饋餉無缺帝嘗謂羣臣

曰盜父子宣力一方寇盜盡平其功誠不小問征閩諸將何如盜對曰湯和由海道進胡廷瑞自江西入此固必勝然閩尤服李文忠威信若令從浦城取建甯此萬全計也後果如盜策處州糧舊額一萬三千石有奇後兵興加征十倍民不堪命盜言之詔從其舊洪武元年拜御史中丞尋兼太子贊善大夫盜受詔北征至處州母已歿盜馳歸乞守制詔不允遣其子存厚還家盜灑泣而出治戎事日謹鄉兵既集命存道部領由永嘉浮海北行盜再請終喪上惻然曰吾固知其情不可奪但朕憲臺缺人耳遂可其奏上

諭存道曰汝父宣勞為多汝尙勉力事功以無忝爾父因授處州衛指揮副使溢自喪母悲戚過度疾日益深卒年五十六上甚憫悼親撰文遣官祭之

胡深字仲淵龍泉人父鈺仕元深天資學識出人尤精鎗馬元季石抹宜孫總戎處州以深為參謀縉松遂麗等處民亂為盜深悉討平之歲己亥明太祖命胡大海取處州石抹宜孫戰敗大軍分取屬邑深知天命有在乃解甲見四縣因不受兵帝召深至南京擢中書左司員外郎續命深總制處州諸暨守將謝再興叛兵犯東陽李文忠擊走之胡深引兵為援議為

城守其後浙西將李伯貞大舉入寇以城堅不可拔
敗績而去帝念深立城功以名馬賜之青田葉仲賢
既服又叛温州方明善攻平陽深悉出偏師討之而
親統大軍攻温州明善勢蹙與其仲父谷珍議納歲
幣繼以鹽若干來貢深奪入覲帝時初卽王位乃擢
王府參軍仍總制處州陛辭帝曰候閩浙盡平當還
汝中書乙巳福建陳友定擾邊深奉命征之建守將
阮德柔兵屯錦江深進擊之破其寨柵友定大懼率
銳卒急圍我營深突陣與決馬蹶被執友定頗加禮
遇深具道天子聖仁援竇融故事感之友定初無殺

深意會元使至督迫之遂跨銅驢烈焰而死年五十
二時太史劉基見日中有黑子奏曰東南當失一大
將深果敗沒帝痛悼不已親撰文遣官祭之追封縉
雲郡伯帝嘗問宋濂曰深何如人對曰文武才也帝
曰誠如卿言浙東一障朕方賴之深有二子長楨次
樞楨授宣武將軍處州指揮僉事

張彥方字文鉅龍泉人以孝謹聞洪武中舉孝廉歷官
樂平知縣剖斷如神冤抑得理嘗編文天祥傳以著
忠節吏民立祠祀之

徐道正字敬之龍泉人初授蘇州推官尋陞監察御史

聞其聲者莫不警懼狀於庭者曲直自明歷官至貴州右叅政致仕

徐庭實龍泉人由舉人任江西金溪訓導秩滿陞太平府蕪湖知縣政尙寬平民懷其惠

張埈字仕元龍泉人由監生授真定推官爲人莊重滯事嚴明獄無冤滯

張泰字希安龍泉人天順間由貢任甯國府推官理獄詞無冤者後家居捨田置渡鄉人至今賴之

葉溥字時用龍泉人登宏治乙丑進士司諫垣糾劾不避居藩臬慈愛得民嚴毅清操始終一節著有槎溪

集祀鄉賢

葉文煥字星橋龍泉人隆慶恩選任詔安縣恩洽士民威懼倭寇三院獎賞歸休林下以壽終

王應宣字葆真龍泉人工舉業事繼母孝萬曆乙酉以春秋領鄉薦署奉化諭分校粵西稱得人司理辰州

征捕有功加服俸陞睢綿二州守轉南康同知三地祠之乞休歸家捐資膳鄉置田賜族屢薦賓筵年八旬終

周文揚字六峰龍泉人讀書孝友以選貢任思南府節推署府有惠政後乞歸養

張守身字君平龍泉人由選貢任南寧知縣清謹多善政陞陝西延安同知再轉山西運同俱以廉能著致政歸途卒祀鄉賢名宦

沈暎字景明雲和人性聰敏有才識宏治乙丑進士累官山東副使所至俱有能聲在山東曹濮適王鏜寇發勢猖甚設法勦絕境賴以安未幾致仕進階亞中大夫林下以詩酒自娛號東村野仙

王一卿雲和人嘉靖辛酉鄉科授鳳陽令歷刑曹郎署皆著賢聲官至廣西僉事孝友居家行多善俗祀鄉賢

梅大光字顯之雲和人由歲薦授太湖丞才猷練達弭夥盜除贖緩擒巨棍擢知陝西醴泉縣未幾挂冠歸別號天放生日以詩酒娛林下

吳一鯤字震川雲和人由歲貢判建甯府有政聲署府篆兼建甌二縣分理裕如於冤獄中釋放儒生謝紹芳官應天巡按士民稱為神君歸林下禮事寡嫂以敬聞登府賓席壽六十餘終

吳浩字用養雲和人少穎悟通尚書以選貢領應天丁酉科鄉薦春榜中三百四名世廟以禮官額例太濫與應解唐寅俱在截數後授廣東惠州司李廉明剛

直惠政及民遷滇姚刺史挂冠歸瘞居四十年壽八十祀惠州名宦

吳仕偉宣平人則之子宏治間進士官禮科都給事中風節凜然義助庶吉士喪疏復誠意伯爵

何燦先字明卿宣平人以歲貢隨征粵省功授翁源令單騎招降賊寇撫集流亡減賦稅興學校後以老告

休歸家仗義好施置石牛渡田造船濟眾舉飲賓壽七十

鄭義禮宣平人大司馬孫公原貞羅致幕下與議軍事務求活人寇平後公欲置軍所守禦之義禮進曰是

又生一寇矣不如立縣以治之宣人至今思其德

李之麟宣平人品行端方邑弟子皆宗師之任渭縣令以靜穆為治刑清訟簡民樂其寬卒於任

潘琴字舜絃號竹軒景寧人沉之子幼警敏通經史為文典則有古風性嚴重不苟合年二十四舉正統丁

卯未析景寧時中青田學鄉薦在太學十年登天順丁丑進士授南京吏部稽勲主事歷兵部武庫職方

員外郎遷福建興化知府省煩苛去浮靡不避權勢母喪起復上疏乞休作招鶴詞以寓意傳聞京師朝

士大夫爭和之彙為鶴溪清風卷家居手不釋卷私

第隣縣治非公事足不至縣文學齒德隱然爲東南重鄉後進多宗之既耄耄神采精健如少壯壽居八十少師李西涯寄詩以賀卒年九十離莆四十年故治民猶移文問安否聞其卒士大夫皆寄哀輓悼之所著有竹軒集咏史和唐詩梓行於世祀鄉賢潘侗景甯人監生貌古性純善詩文任全椒令興學禦寇民甚德之陞江西都司經歷十年卒全椒士夫共爲哀詩哭之

國朝

陳象乾字天如麗水人歷泉州貴陽知府政績茂著在

家孝奉孀母又常捐館金周隣人之急

錢元炆字茗夫麗水人金生曾孫以拔貢充教習授知縣歷任隴西甯夏諸縣擢固原知州以憂歸起授岷州改涇州稱疾歸其在隴西濬小西湖十餘里以巨石隄其險要居人免於汎濫名曰錢公隄鄉民王鳳翔誣人毆死其子獄具而尸勿得元炆榜於衢日獲王某子者予重賞已而果得其子匿所反其獄眾以爲神葢岷州新廟學工竣有四鶴來巢故事歲豐歉以季夏爲定秋災毋得報元炆請於大吏夏秋分報遂沿爲例民尤享其利焉

張紳字體乾麗水人少孤而貧能自立以拔貢授羅源知縣時耿逆開藩家丁倚勢為奸莫敢忤紳執而治之其黨惕息聲振八閩及卒民護其柩以歸

吳奇標字錦先麗水人以貢生授福建邵武通判署政和縣事時閩中初定民多流離失所奇標安輯有方邑以稱治卒於官

黃繩先字紹庭麗水人以副貢授泗洲判屢獲巨盜保陸知縣格於例不即授歷署劇邑有聲嘉慶十四年授蒙城縣縣遭亂邑里蕭條繩先多方招來流亡漸集無何大吏令鬻叛產佐軍需繩先謂叛產蕪萊未

墾無受者宜緩之不得請移書故里鬻已產充之以獲鄰盜膺卓薦尋卒子二中字通理裳字體元中以縣丞需次福建道光六年夏隨總督孫文靖勦辦臺匪及濬鹿港開五條港皆有功補崇安縣丞署將樂知縣卒於官裳以縣丞試用山東曹州府會教匪林清亂後尸骸委野裳捐金瘞埋且夕督視之以勞瘝卒

葉秉禮字耕之麗水人拔貢以四庫館膳錄議叙縣丞分發福建攝海澄丞時林爽文亂臺灣大兵進討海澄地居衝要兵使絡繹秉禮不辭勞動事至立辦無

何同安蘇葉倡亂漳郡戒嚴秉禮晝夜登陴不遑寢食月餘乃定乾隆五十九年大水長泰南靖等處被災尤甚糧道往賑檄秉禮與俱委任之所至稱平明年復大饑漕廈門粟以濟秉禮泛舟往來閱數月不倦嘉慶二十年擢惠安知縣縣海疆劇邑號難治秉禮撫綏得宜有慈君之目俸滿加通判銜比卒宦橐蕭然

王惟球字序東麗水人以拔貢授州判需次甘肅嘉慶初征白蓮妖匪於湖北大帥調惟球隨營左右戎行甚有勞績署黃梅知縣修建潘興口江隄四百餘丈護田數百頃民勒石頌德旋補鶴峰州判有張有本者坐殺人逮繫二十年獄不具惟球奉檄往鞠得其兇咸驚以為神白蓮匪平以功題陞東湖知縣格於例不果調歸州判地有灘極險春漲時覆溺尤眾惟球增置救生船拯濟無算同知張某運滇銅至灘舟壞且求死惟球營救資遣之調署興山知縣改隨州唐縣鎮判猾賊戴么等贓累巨萬積年名捕不得惟球立擒三十餘人民為建生祠祀之年餘調署鶴峰知州卒惟球工書能篆刻雖處煩劇操翰不輟性尤好菊所著印譜詩集皆以冷香名之

董迪字惠吉麗水人以優貢授鎮海訓導有表行生善刺人隱事要挾盜起因以爲利迪察其尤者嚴懲之宿習爲之頓改以薦授都勻經歷都勻故盜藪迪至數月盜屏跡會以憂去盜熾如故守太息語人曰天下健者洵惟董公矣服除補大名經歷先後總督蔣攸銛那彥成皆嚴於弊吏顧謂迪能留省委用以勞陞知縣署昌黎縣事巨盜郭憑陰與吏通更數健令不能得迪抵境投牒者率言憑迪曰憑猾賊非吾力所及且吾非真授行去此姑待能者可矣投牒者詞益強迪好語之曰我實不才以遺父老憂幸父老諒

我竟返其牒眾譁笑去莅治月餘初不言盜一日密語營弁曰亦知郭憑蹤跡乎曰知之迪曰若爲弗聞也者何也曰向者令草芥遇我我亦膜視之辱公體貌我當爲盡力耳遂昏夜率健卒往擒之譁者乃大服尋病卒著有菊軒詩草

閻秉義字中和麗水人幼侍父台州都司任所遂嫻武事由外委游陞寧波城守營守備俸滿以曉暢營伍薦有大賈覲教塲隙地欲取爲利知秉義且卸事致千金求銷冊檔秉義峻拒之會府詣勘樹碑定界焉尋陞廣西左江都司左江舊設巡船以防水盜歲久

視爲文具秉義至飭屬募水手更番偵緝以獲盜多寡給功過執照爲殿最年餘捕盜數百舟行得安枕調右江上林擢隆林遊擊駐劄八達八達距州城二百餘里逼近交阯土人與猺獠雜處俗獷悍不知書信巫鬼病不服藥死則以火化秉義爲置義塾延師講習勸立藥局造棺槨俗漸革道光十二年署鬱林衆將適廣東猺匪滋事防勦兩廣接壤之丁堂卡上黎鞭子冲等處始至猺匪偵知我兵單乘夜搶渡秉義伏兵下流突起掩殺斬獲甚多明日提督蘇紹榮領大兵至賊已遁去紹榮令搜捕上黎等處以請功

秉義謂是皆順猺不宜擾之紹榮厲聲曰有謂順猺不宜加兵者以失誤軍事論秉義立繳關防待罪而密報左江總兵文哲輝哲輝亦力持不可紹榮氣沮乃止協揆兩廣總督李鴻賓聞之譴紹榮而深獎秉義委署潯州副將十四年推陞山東濟南叅將以疏濬城河功部議加一級十八年復奉記名以副將陞用明年以母老乞養歸遂不出卒年七十五母後二月卒年九十八

葉攀鱗原名攀龍字振飛麗水人以優貢授知縣署湖南興甯縣事精力強果不畏煩劇勘驗至鄉恒自攜

炊具從者量地遠近給直不以供張擾民循行阡陌力農者獎之民大勸彬州饑檄取興甯米民以興甯纔自給懼而誦攀鱗言於州謂取興甯米濟郴不足而興民告匱且兩擾事得寢縣有牛子凹爲盜藪數十年攀鱗親往搜捕盜解散去調湘潭治如興甯卒於官

朱有章字文煥麗水人拔貢 朝考一等授四川知縣 歷署奉節酆都新繁梁山諸邑所至有惠政百姓甚愛戴之題補大邑縣星夜從公積勞成疾母又春秋高遂告歸旋里被服如儒生足跡不入城市積書數

萬卷口不絕吟咸豐十一年粵匪踞城檄有時望者充僞職必欲得有章章見檄大罵焚之率勇捍禦徙母居九盤山日一往省賊偵之潛伏山下章適奉母他徙賊焚山藜而去同治三年卒著有燼餘殘稿

孫可訓號天巖青田人順治拔貢授偃師知縣均徭役備積貯興學宮築署墻邑事畢舉以父憂歸服闋補翁源令俗多告密株連良民訓下車立辨誣獄數擊大猾害遂息以郡薦擢南雄丞尋以母憂歸初謁選在都授經皆南陽子弟後盡歷膺仕與河汾比盛云韓錫胙字介屏號湘巖青田人遠祖武宋紹興進士後

中博學宏詞科仕至集賢院學士祖湄康熙辛卯歲
貢爲邑宿儒父榮先庠生事親以孝聞錫胙生而穎
異襁褓中口授孝經卽成誦至性過人祖母病自塾
歸必先候問讀書常達旦不寐旣長博極羣書自經
史天文樂律方技道書釋典無不通曉乾隆辛酉拔
貢補八旗教習中順天丁卯舉人戊辰教習期滿揀
發山東知縣歷知平陰禹城平原齊河萊陽等縣平
陰有金牛窪地卑下積水不可耕前令于公欲渠其
下流買民田二里許未浚去官錫胙至刻日浚之遂
成沃壤禹城地多窪常苦潦錫胙相度形勢謂徒駭

河潔河可洩水乃北自窪王莊至張虎莊浚溝一十
八里西鑿韓家砦河溝七里東鑿祝家莊至二郎廟
凡里許其南則一自苗家林至五家橋爲溝二十三
里一自鐵杵莊至雷家莊爲溝一十八里或入徒駭
或入潔河禹城水患遂息壬申東省蝗創捕蝗法分
區畫界立竿綴布以爲識每方一里用夫四百人每
五十人設一夫頭督之以甲長每百人設水甌十副
運水以解其渴官與胥役爲鄉夫裝往來課勤惰無
不人人盡力計日而蝗盡滅上官刊示其法是歲蝗
不爲害甲戌連丁內外艱留主灤源繁露兩書院講

席服闋赴補庚辰冬投金匱令邑多無賴子爲市井
患至則盡拘而痛懲之皆歛迹支貞女者羊尖朱氏
婦撫從兄文耀子爲嗣尋死文耀失望欲以計逐貞
女訟於庭訊得實遂杖文耀而旌貞女邑中稱神明
丁亥秋調寶山有商舶擱淺爲姦民劫奪焚燬悉捕
繫之置之法己丑冬陞同知旋擢安慶知府皖省多
滯獄大府常檄令會鞠平反者眾嘗語其子曰治獄
之道見事貴明立心貴恕設身處地再四沉思自能
洞見端委其稍有可原者則宥之庶無枉縱之弊是
夏旱郡屬蝗以禹城捕法授之皆應手滅郡西三里

有漳葭河舊爲帆檣避風之所歲久淤淺巡撫裴公
定議疏濬令錫胙董其役時方嚴冬日夕策馬風雪
中督率勸勉無少懈閱四月而工竣壬辰調守松江
整飭鹽政刊松所鹽務成案以示後郡境黃浦有高
頭大網能害人密捕獲之乃繪圖出示嚴禁以絕後
患復浚河道以通舟楫十月調守蘇州明年檄署松
太道尋陞蘇松督糧道未履任而卒年六十一錫胙
性恬淡不問生產旣貴儉約刻苦如平時親舊貧乏
割俸相周不少吝工書畫論者謂可肩隨趙吳興詩
古文尤俊拔絕俗著有滑疑集十八卷行世子五長

作魯諸生有父風

李培荃字楚之青田人嘉慶癸酉拔貢考授鑲黃旗教習歷知山東泰安嘉祥縣政績有聲親族貧苦分俸周之子銘恭歲貢生

鄭惟颺字元崧縉雲人康熙庚戌進士授長葛令民積困流亡者眾惟颺至多惠政稍稍安集歲餘以父憂去服闋補海康海康瀕海颺風屢作且軍興絡繹經理孔艱惟颺不事擊斷眾務畢張居二載以勞瘁卒於官民奉祀於二蘇亭

鄭載颺字元閻縉雲人進士授中書康熙辛酉江西副

典試遷甯國府同知明敏慷爽禦奸綜密郡丞例不治獄遠近爭懇輒申理之厯署相川太平篆所至皆能執法卒於官

丁國華字廷英縉雲人事繼母以孝聞乾隆丁酉拔貢縉雲縣前溪爲溫處孔道當夏秋霖雨溪流驟溢公私阻絕國華爲諸生時慨然議建石橋經營八九年盡眾力然後成時所謂大興橋也授福建泉州府涪州場鹽大使勞心督曬視廢坎可復者命修之不可復者詳免之場務日起丁役皆樂爲用閩地習械鬪往往小事聚眾白梃相擊國華以爲理義不勝血氣

所以盛也乃時召耆老與之處擇良士暇自課之曉以國家之法道以鄉黨之誼人皆懽然而喻鬪風爲息五十一年涪州大饑死者棄沙灘國華至盡收而瘞之調祥豐塲大使卒於官

楊喬字南木縉雲人年十四補弟子員弱冠拔貢考取八旗教習以知縣試用陝西時值軍興勤勞奏績特授三原知縣以廉能稱丁父憂歸服闋仍授陝西長武知縣久旱步禱太白山甘霖大沛士民立碑記其事尋調臨潼縣復以母憂歸後補直隸平鄉良鄉各縣薦卓異陞磁州未任卒

劉曰勤字如始松陽人順治間以貢授廣西上思州時廣西未下從事行間以積勞卒

王汝棐字篤甫松陽人以進士授行人尋管臨清倉革陋規釐貪婪倉儲豐裕擢福建延建邵道輯兵惠民風厲僚屬稱上游保障康熙庚戌主試福建省安溪李文貞公光地出其門

毛有翎號蒼梧松陽人授貴州尉盜息民安俗婚同姓嚴革之轉應城修黌宮建先賢祠及期丁母憂父老遮道送之立去思碑於學歸捐資修祠壽八十三鄭元幹字硯聲遂昌人順治戊子恩貢考選通判改授

陝西永昌衛經歷掌酒泉郡事遷江南蘇州府同知
弭絕盜源視崑山縣篆時漕項嚴緊民有賣男鬻婦
者捐俸代之恩威並濟兵民安堵解組歸行李蕭然
壽八旬無疾而終所著有覺世金繩含馨齋隨筆歐
陽文忠公讀書法

官文濬字鏡涵遂昌人邑庠生援例署山東鹽大使陞
任福建連城知縣勤政治絕苞苴有貴介來謁語次
微及公事臨別遞一密函啟視則千金券也卽擲還
之一富商爲事株連檄提有名懼甚僚屬謀乘機取
利濬召商至諭以無恐旣而眾欲不遂思中傷之動

以飛語絕不爲撓卒脫其人於禍有無賴犯法緣坐
幾至十人廉得其情置爲首者於法餘俱宥之平恕
廉明上游屢擬保薦以親老辭歸

官承誥字廷襄遂昌人父聖基樂善好施誥自少倜儻
不羈由拔貢分發廣西歷署上林縣丞天河縣知縣
江州州同安平州州判所至皆著政聲嘗由江州回
省條陳邊事上憲嘉其熟悉邊情將不次擢之旋以
憂歸遂不復起

朱霖字沛蒼遂昌人官歸化場大使莅事廉明不可干
以非義督煎催課加意撫綏有昌黎縣鹽丁苦差役

丞為陳請裁免各竈戴之如父母以母老辭歸家居奉母色養備至喜詩古文詞著有雨亭吟草訓子渭嚴正有方膺辛卯科鄉薦

朱燦榆字星階遂昌人由拔貢授直隸州州判歷署福建龍巖州溪口州有惠政尋以憂歸服闋改廣東候補時海氛不靖奉檄巡緝冒颶風得眩暈疾乞歸粵匪犯境集鄉團捍禦晝夜靡暇遂成疾卒著有見山草堂詩文集

梅調鼎字燮五龍泉人順治十一年拔貢任廣東茂名縣丞署縣事有惠政未幾乞休

姚梁字佃芝慶元人少聰穎過目成誦未冠遊庠由己卯優貢中順天乙酉經魁登己丑進士授內閣中書擢禮部主事刑部員外郎典試廣西陝西督學山東除饒州知府署川東兵備道江西廣西按察使調河間府知府清廉耿介毫不苟取任饒州時民立生祠祀之所至有政績子崇恩甘肅縣丞

吳鳳翔字鳴陽慶元人由恩貢授廣西新寧知州俗號難治翔下車不事刑威崇尚德化翕然大治以親樞未厝乞歸

姚大齡字延之慶元人任常州府靖江縣丞廉明正直

愛民如子致仕歸

姚家棟字吉甫慶元人初任江西廣信府貴溪縣丞委署縣事復任廣東南雄府保昌縣丞歷有政績

田慶餘字瑞齋慶元人已酉拔貢由教習俸滿用知縣署湖南石門縣事聽訟多才政聲卓著致仕歸卒於家

吳邦慶雲和人崇貞時拔貢生順治四年授教諭十一年中江南副車終廣東肇慶廣甯知縣在職以廉明著

湯建麟字國趾雲和人太學生順治十六年任四川叙

州府軍糧同知涖政廉平

張濬字宏川雲和人博綜經史尤敏於詞賦干言立就學使錢殿撰以國士目之由拔貢授山東曹縣汶上縣丞改沂州通判權嘉祥知縣轉河南安陽縣丞終湯陰知縣先後管河務甚有勞績在嘉祥時有猾吏某佔良家產守令以某故憲吏掣肘不敢決濬捧檄往鞠得其情置吏於法上下咸服其能以憂歸遂絕意仕進署所居曰信天巢著有吹劍篇鴻爪吟弟濤字學山亦拔貢生考充鑲白旗教習授州判署廣東嘉應州同知終昌化知縣著有嶺南雜詠

魏文瀛字海三雲和人天台司諭精之子砥行績學由
舉人授知縣需次江蘇會有十數疑獄檄文瀛往鞫
得其情大吏稱之歷權上海金山縣事所至得民金
山有河淤塞文瀛倡俸濬復民賴其利時林文忠公
撫吳以勞保陞知州銜調署華亭知縣旋以母憂歸
文瀛有至性遂以哀毀卒於家著有借觀樓詩草燕
遊草鳴琴餘韻

吳從謙字宗讓景寧人順治戊子拔貢官湖廣臨武知
縣撫輯流移均平徭役多善政尋陞武岡知州淮安
河務同知卒於官

葉天方字達冲景寧人順治甲午拔貢官湖廣安化知
縣政持大體盡協輿情致仕歸民為立去思碑所著
有南北紀游集歸來吟詩草

處州府志卷之十八終

賦前甲子封貢官勝亂定外

谷南武縣燕巢亂來今結草

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

文獻自全性遂以哀殿卒於

